

KANA MULIMU WA CINCANGA

MULELO WA HAE?

 . . . Mulimu. Halu yemeñi ona cwalo ni litoho za luna ze inami, fa nako nyana fela.

Ndate yakwa Lihalimu, lu itumela ku Wena ka nto kaufela ye tabisa Ýo lu file. Ha lu swaneli kuba—kuba nihaiba yeñwi ya limbuyoti za Hao. Ze kwateni ha ki limbuyoti ze lu swanela ze lu amuhela. Mi lwa lapela, Mulimu, kuli U zwelepili kuba ni luna. Ku zamaya fela mwahali ni ku utwa moya omunde wo mwa mukopano, Ña ziba u zwelela ku Wena. Kacwalo Na lapela, Ndate, kuli U zwelepili ku kuteka mukopano busihu boo, ka Kubateni kwa Hao, ni kufolisa bakuli kaufela ni baba imezwi. Lumeleza cwalo. Bo kwateni ibe—ibe busihu bo butuna bo lusike lwa libala kapili, bakeñisa Kubateni kwa Hao. Lwa kupa ka Libizo la Jesu. Amen.

² Ni bata kukupa swalelo ka ku liyeha nyana maabani manzibwana. Ni ka lika kuba ya bunolo busihu bo, mi ili fela kuli lu akufe mi—mi lu lapelele bakuli. Na ikutwa hande luli mwendi mukopano wa maabani busihu. Ne ku bonahala kuli nekuna ni batu babañata bene ba folisizwe. Mi Ne ni na ni tuso yeñata, mañi ni mañi na lapela, mi hamoho. Cwalo kona mo lu yemela. Kacwalo, Mulena ami fuyole. Cwale, Na sepa, kamuso busihu lu lukela kuba . . . Ni sepa ba zibahalisize kale. Ki sibaka sesiñwi—sesiñwi. Ku lukile.

³ Cwale ha lu apuleñi mwa Buka ya Numere, kauhanyo ya 22, kapili fela, ka tuto palo nyana fela, kuli nhi bulele litaba nyana zelikani, mi kona lu ka toma nako yeñata mwa mukoloko wa litapelo.

⁴ Billy ubulezi kuli ufile libunda la makadi, tu kamba sili handeleti a ona. Mi ku ka nga nako kuli lu afeze kaufela mwa mukoloko wa tapelo, kacwalo Ni—Ni ka bulela fela ka mizuzu yelikani, isiñi kufitelela mizuzu ye mashumi amalalu, haiba ku konahala, mi ni ku kala mukoloko wa kulapelela, kulapelela bakuli. Mwa Deuteronomia, mwa . . . Mu ni swalele.

⁵ Numere, kauhanyo ya 22 ni timana ya 31, Ni tabelia kubala se.

Mi MULENA a kwalula meeto a Balami, mi ki ha bona lingeloi la MULENA li yemi mwa nzila, ni lisweli mukwale o comozwi mwa lizoho la lona: a teya toho, mi a welafafasi ka pata.

⁶ Cwale ye i kona ku utwahala inge palo nyana ye siyo hande kuli—kuli i fe mayemo ni kuba ni sebelezo ya foliso ya luna. Mi Ni ka lika kuba ni mukoloko wa litapelo kuli ukalise ka naini kiloko, haiba ku konahala. Cwale Ni bata kunga tuto busihu boo yakuli: *Kana Mulimu Wa Cincanga Mulelo wa Hae?*

⁷ Mwa ziba, lwa kona ku cinca mihipulo ya luna, mi kakuli lu—lu itutile zeñwi ze shutani nyana, lu ziba kuli ne lu ezize mafosisa.

⁸ Kono ha Ni lumeli kuli Mulimu wakona kucinca mulelo wa Hae. Kakuli, haiba Aeza cwalo, konakuli Hakoni kuba ya sa feli, mi Na ka ba ni keto yende haiba Na ka i cinca. Kacwalo Yena... Tumelo ye Ni nani ku Yena, kuli—kuli Ha cinci mulelo wa Hae. Kakuli haiba Mulimu a ba ni keto, Una ni kuina ni keto yeo. Mwabona? Mi nako kaufela butata ha bu taha, Una ni kueza ka nzila yeswana ya Na ezize ka nako yapili, kamba Na ezize ka mafosisa ka nako yapili. Mwabona? Kacwalo si lufa nto yeñwi kuli lube ni—ni tumelo ya makalelo. Cwale halukoni ku...

⁹ Eeni, tumelo ha ki sika fela se si bunolo se si tokwile mayemo, so kona kufefulela *fa* ni kwa sibaka sifi kaufela. Ki sika se si na ni ku ikolwisisa. Sina ni kuba ni mayemo. Mi, cwale, Hani koni kutoma tumelo yaka ku sesiñwi sa kubulela fela. I lukela kuba taba ye pakilwe hande Ni si kaba kale ni tumelo.

¹⁰ Kuswana fela sina muuna ya keta musali, kuli anyale. Kiñi, una—una ni kuba ni tumelo ku musali ya nyala yoo, kusi cwalo u ka ipizeza fela butata bo butuna. Mwabona? Kacwalo una ni kuba, una ni kuba ni tumelo, niti yeñwi ye tile, tumelo yeñwi ya ku yendama kuyona; *fa* linzwi la hae, ku sa bulezi mutu usili, kamba nto yeñwi. Una ni kuba ni sika sa ku talimisa sifateho sa hae, tumelo fateni.

¹¹ Kacwalo Ni ikutwa kuli, ku kopana ni Mulimu, kuna ni fela nto iliñwi ye Ni kona kutoma tumelo yaka ku yona mi yeo ki Linzwi la Hae.

¹² Kakuli, luna ni minahano ye shutana, mane ku luna kaufela baba cwalo. Ne luka inafafasi ni kukala kubulela sika sa kuca, kiñi, ne luka shutana *fa* sika sa kuca; mi lu ezizwe baba shutana, litakazo miceleo ya luna za shutana. Mi kabakaleo li ezanga likeleke za luna, lu bona kuli za shutana mwa minahano ya zona ka ze lukile ni ze fosahalile. Seo si lufa, mañi ni mañi, litohonolo la kuba ni keto.

¹³ Kono, ku na, Ni—Ni lumela kuli Linzwi la Mulimu li lukile. Mi ha Ni—Ni lumela kuli ki toloko ya kwa mukunda. Ni lumela kuli kona mo I bulelela fela ona cwalo, yeo kona Niti. Mi cwalo kona mo Ni lingela, kuba fela makalelo a Lona ka kuba Linzwi la Mulimu. Cwale, Hanina tumelo yeñata, mwendi, ya kueza kuli li beleke, kono ha Ni na kuyema mwa nzila ya mutu yana ni tumelo yeñata kuli a Li belekise.

¹⁴ Sina, ka mutala, Enoke nana ni tumelo yeñata kuli na sa lukeli kushwa. Na itamaela fela musihali cwalo, mi a katala mwa lifasi le ki ha ikela fela kwa inza zamaya a kambama Lihalimu. Ne ni ka tabela kuba ni tumelo yecwalo. Kono Ni sepa kuli lu ka amuhela tumelo yeo zazi leliñwi, halunze luya luhula ku Yena. Cwale za luna . . .

¹⁵ Libaka le Ni ketezi sibaka se, kakuli ku bonahala sina cwalo fa, ku na, ki sibaka silisiñwi mwa Bibele se si kona kuba se—se si ipitezi nyana mwa palo ya busihu boo, kakuli ku bonahala inge kuli Mulimu na cincize muhupulo wa Hae, na bulelezi Balami taba yeñwi ya kueza mi ni ku mu bulelela nto isili ya kueza. Kacwalo Na eupula kuli, mwendi, fa nako nyana fela, lu ka lika ku otolola se hande, ni kubona sa Na mu bulelezi luli.

¹⁶ Kacwalo he ka ku tatulula taba ye. Lu ziba kuli Balami nali—nali—nali mupolofita. Mi Balaki nali mulena wa Moabi, ka nako yani. Mi ne ba si baba sa zibi za bulapeli, kwani kwa Moabi, ne ba sebeleza Mulimu ya swana yo Isilaele na sebeleza. Kakuli, Moabi, naha ne i kalezi ka mwana mushimani wa Lota, ka mwana hae wa musizana, mi kacwalo ne ba sebeleza Mulimu ya swana. Haiba mulemuha, litabelo za bona ni lika kaufela neli zeswana fela, lipoho, mi hape ni litotolo, kuambola ka za Kutaha kwa bubeli. Mi cwale haiba za milao kona fela zeo Mulimu abata, kona kuli Moabi nali fela wa milao mwa sitabelo sa hae sina Isilaele mwa na bezi. Kono lu ba fumana cwale, Isilaele u mwa mukoloko wa kulatelela Linzwi la Mulimu, kwa naha yene sepisizwe ku bona. Mi ba taha . . .

¹⁷ Fa kuna ni mufuta wa za nama ni wa moyo, o kopana. Mi cwale za nama ni za moyo ha li kopana, kamita kubanga twaniso, kakuli li tahanga hande kunatana ka toho ku yeñwi ni yeñwi. Mi Isilaele fa, ni yena, Ni bata ku li bonisa kuba Keleke ya moyo; ni Moabi sina keleke ya nama, ki keleke fela, se lu biza, keleke ya nama.

¹⁸ Mi luna kaufela lwa ziba hande kuli kuna ni—ni keleke, mi kuna ni Munyaliwa ya zwa mwa keleke yani. Lwa ziba cwalo, kuli yeo kwateni ki niti.

¹⁹ Mi ba kopana faa. Mi lu lemuha kuli hane ba kopani fa, sa to ezahalela mwataswa nto yeñwi ye Ni tabela kubulela fateni fa nako nyana. Ba sa to kopana fela, mi alimuñwi abona sa na eza yomuñwi, ne kuna ni malikanyiso amatuna, yo ulikanyisa yomuñwi.

²⁰ Mi fo kona fo lu li fumana kacenu, kuli lu ba hahulu ni malikanyiso. Mi ha u eza cwalo, kamita u kana uba mwa butata. Ha ukoni kupila bupilo bwa mutu usili. Ha lukoni kulikanyisa sika. Lu lukela kuba fela mo luinezi. Ha u lukeli kulika kueza cwalo, haiba mutu *yo ueza* sika, kakuli wa si eza, unahana kuli una ni ku sieza, ni wena. Ha u lukeli kueza cwalo. Wena u mutu u nosi, ku Mulimu. Mi ha lu lukeli kulika kulikanyisa mutu.

²¹ Mi cwale, Isilaele, mwa sibaka sa musebezi, ba zamaya mwa musipili wa bona kuya kwa taelo, ka taelo ya Mulimu, kuliba kwa na ha ya sepiso, ba yo mangana ni Moabi, sikwata sesiñwi sa balumeli.

²² Mi Ni sepa kuli se ha si utwahali bumaswe hahulu. Kono siswaniso nyana se Ni bata kueza ki se fa, Moabi inza pila mwa na ha, ne li fela inge bulkani bobu ongaongilwe. Nana ni baika ba hae, ni licaziba za hae za mwa... mubuso wa hae.

²³ Kono Isilaele nali fela—nali fela muyambaeli. Neba sina sibaka sesiñwi kwa kuya. Ne ba yambaela fela sina Mulena mwa na ba zamaiseza. Cwale, Na lumela, hape, Balami, kasamulaho mwa sipolofita sa hae, ali, “Sicaba ne si sike kuba mwahala linaha. Ne ikaba fela baba hasani.” Mi cwalo kona mo kubelanga kamita. Mi lufumana kuli, kangisano ya taha.

²⁴ Inge fela Kaine ni Abele, ne ba tile hamoho mwa kangisano. Mi bona kakuba mizwale, mi bubeli bwa bona ba na ni me yaswana, Eva. Mi lu fumana kuli ba lemuha kuli neli batu ba butu, mi neba ikabile mwa Bupilo, kuzwa mwa simu ya Bupilo. Mi bubeli bwa bona ne balika kufumana nzila ya kukuta ka yona. Mi haiba mu lemuha, bashimani bababeli bani neli ba bulapeli hahulu. Kaine nali fela wa bulapeli sina Abele mwa na bezi. Mi sibeli sa bona ba yaha tutala, ka manzwi amañwi, ki keleke. Sibeli sa bona neba ezize sitabelo. Sibeli sa bona ne ba lapela. Mi neba—neba sebeleza Mulimu, bubeli bwa bona, kono alimuñwi wa bona na Mu sebeleza ka mafosisa.

²⁵ Cwale, mwa bona, wakona kuba ya sephala kamita kono kanti inge uli mwa mafosisa. Wakona ku fossa. “Kuna ni nzila ye bonahala kuluka, kono mafelelezo a yona ki nzila ya lifu.”

²⁶ Cwale lu—lu bona kuli ye neli niti hahulu ku Kaine ni Abele. Mi ha ba bona... Kaine a bona sitabelo sa Abele kuli ne si amuhezwi. Mi, Na kona kuyemela fa kubulela kuli, kiñi Mulimu ha na amuhezi sitabelo sa hae? Ki kuli—kuli na li... Ka sinulo, na utwisisa kuli ne si ma apule, kamba Na lumela cwale bana ni yona ya litolwana ze fubelu kamba nto yeñwi ye ne ba cile mwa simu ya Edeni, kona ye ne tisize sibi. Mi afumana Adama... kamba, Ni taluse, Abele na lumela cwalo kuli (yena) neli mali. Mane, luli neli ona cwalo. Mi Abele, ka sinulo, tumelo, afa ku Mulimu sitabelo sesinde hahulu kufita sani sa Kaine; ili yo Mulimu na pakile ka zona, nali ya lukile. Mwabona? Mi Keleke kaufela iyahilwe fa sinulo ya Bumulimu ya Linzwi la Mulimu. Kaufela...

²⁷ Jesu na bulezzi cwalo. Zazi leliñwi, hana tuluka fa lilundu, Ali kwa balutiwa ba Hae, “Kana muli ki Na mañi na nili Mwana mutu? Kamba batu bali ki Na mañi?”

²⁸ “Mi babañwi ba bona bali, kihande, U ‘Mushe,’ U ‘Elia,’ kamba ‘alimuñwi wa bapolofita.’”

A bulela kuli, “Kono mina muli ki Na Mañi?”

²⁹ Mi Pitrosi a bulela manzwi amatuna ao kuli, “Ki wena Kreste, ili Mwana Mulimu yapila!”

³⁰ Ki hali, “U fuyozwi wena, Simoni, mwana Jonasi.” Mi ki yeo kañi yetuna mwahala balumeli.

³¹ Cwale keleke ya Katolika i bulela kuli, “Kwani Na—Na yahile Keleke ya Hae ku Pitrosi, kakuli Na ize, ‘Ki wena Pitrosi,’ licwe nyana, ‘fahalimwa licwe le, licwe nyana le, Ni ka yaha Keleke ya Ka.’”

³² Kihande, cwale, buñata bwa Baipanguli ba lumela kuli na Iyahile ku Yena muñi, kuyena Kasibili, kuba Licwe la mwa lilulu. Kono, mwa bona, Nali yena Licwe la mwa lilulu kwa muyaho. Ni lumela kuli Na yahile Keleke fa . . .

³³ Isiñi kuba ya shutana, kono, mwa bona, puzo neli kuli, “Kana batu bali ki Na mañi?”

³⁴ Mi Pitrosi ali, “Ki wena Kreste, Mwana Mulimu ya pila.”

³⁵ Ki hali, “U fuyozwi wena, Simoni, mwana Jonasi, nama ni mali ha li si ka ku patululela seo. Ha u si ka ituta se ka kuya kwa sikolo sa bulapeli. Mwabona, ha u si ka ituta se ka silikani sa mutu. Kono Ki Ndate, ya mwa Lihalimu, ya ku patululezi seo. Mwabona? Fahalimwa licwe le Ni ka yaha Keleke ya Ka, mi minyako ya lihele haina ku I koma,” sinulo ya moya ya Jesu Kreste, Yali yena Linzwi. Kona kuli likona fela kupatululwa ka Linzwi la Niti, foo kona fo i tiyezi luli Keleke.

³⁶ Ni sepa kuli seo kona sa na nani Abele kwa simuluhu, sinulo ya moya kuli ne si muselo wa simu kamba misebezi ya mazoho a luna, kamba zeñwi cwalo. Neli mali. Mi afa ku Mulimu sitabelo sesinde hahulu kufita—kufita sa na file Kaine.

³⁷ Lu fumana ku Abrahama ni Lota, taba yeswana, mwa keto, kakuli Lota na shetumukile, nako ha i taha, mi keleke ya moya ni—ni ya nama ha li taha mwa kangisano, bakeñisa balisana. Neba na ni ku kauhana yomuñwi ni yomuñwi. Mi nako kaufela se ha si ezahala, si bupa muna.

³⁸ Lu fumana kuli Abele, kakuli Mulimu na mu amuhezi, mi Na si ka amuhela sitabelo sesinde sesituna sa Kaine, sa na nyandeki hahulu ka mabote amatuna, mi nali wa bulapeli, mi a kubama fafasi ni kulapela, ni zeñwi cwalo, a eza lika kaufela za na eza Abele, fela na sina sinulo ya sene sili niti. Kacwalo lu fumana cwana, kuli fani Mulimu ha amuhela sinulo ya Abele ni nubu ya hae, ya eza kuli Kaine abe ni muna ka Abele. Mi yani neli yena sibulai sa pili.

³⁹ Lu fumana kuli muna wani wa toba mwahala balisana ba Abrahama ni Lota, mi neba na ni ku kauhana.

Lu fumana kuli Mushe ni Kora ne ba na ni lifapahano, ni bona.

Jesu ni Judasi neba na ni lifapahano.

⁴⁰ Mi sina kamita, ibile nto yeswana, mi kona mo ku sa inezi ni kacenu, keleke ya nama ni keleke ya moya ina ni lifapahano ha litaha hamoho. Cwale, za nama li lika kutamana ku za moya, kamita ka malikanyiso a nama fela. Kono, sina mo ne kuinezi ku Esau ni Jakobo, halina kubeleka.

⁴¹ Mulimu una ni Keleke ya Hae ye bizizwe, ye na ni libizo, ni kubeiwa kwatuko. Mi mwa lusika lo Ipila ku lona, Uka ipatulula Iliyena ku Yona, ka nako kaufela, inge fela mwa Na bulelezi mwa Maroma kauhanyo ya 8, kuli zibo ya makalelo kamba tukiso ya Mulimu ikone kuyema hande. Kaine, kamba Ni taluse . . .

⁴² Esau ni Jakobo, mane kusika pepwa kale mushimani ufi kaufela, mane ba si ka ba kale ni kolo ya kuba ni keto, Mulimu ali, "Ni toile Esau ni lata Jakobo," kakuli Na ziba sene sili ku bona, kuzwa kwa simulaho. Mi lwa ziba . . .

⁴³ Mbuluke seo mwa munahano wa hao, Wa ziba sesili mwa pilu ya hao. Wa ziba so talusa. Hakuna taba ka se lu bulela, Wa ziba so talusa.

⁴⁴ Mi kamita li tisize butata. Mi bona, ba . . . kamita, za nama kamita za likanga, kuzwa fani Kaine a bulaya Abele, za nama libile li lika ku sinya muzamaelo wa za moya. Lu fumana lika zeswana kacenu, yona taba yeswana luli kacenu. Si bonisa kuli si zwelela ku Satani, kakuli ki muna ni malikanyiso a Niti.

⁴⁵ Kacwalo, luli lu lumela kuli Mulimu ha cinci mulelo wa Hae ka za Na bulezi. Yena kamita wa Li bulukanga ka niti.

⁴⁶ Kono Una ni tato ya kapelezo. Cwale, foo, fo kona fo ku na ni butata. Lu lika kubeleka fa tato ya Mulimu ya ku hapeleza, mi Uka li lumeleza. Kono hape haiba lunga tato ya Hae ya ku hapeleza, ni ha i si ka luka, Uka eza tato ya Hae ya ku hapeleza ku sebeza, hamoho, kuli i kanyise tato ya Hae ye petehile.

⁴⁷ Hakuna se si ka fosahala, ni Mulimu. Luna fa . . . Wa ziba ko ku sweli ku zamaela waci, busihu boo. Hakuna se si fosahalile. Kalulo kaufela isweli kunata ka swanelo fo i swanelo kunata, lika kaufela. Fo lu nahana kuli ku fosahalile, kono Wa ziba kuli li lukile. Li lukela kuba cwalo.

⁴⁸ Sina kwa simulaho, Mulimu na lumelelize fela sibi kuli si tahe, Na si ka eza cwalo, yani ne si tato ya Hae ye petehile.

⁴⁹ Kono, mwa bona, Mulimu, ona Moya omutuna, yena Ndate, ku Yena neku na ni milelo, mi lika ze mubona ha li bonahalisa cwale ze ki milelo ya Hae fela ye bonahalisa. Na ipilela anosi, Yena mane nasi nihaiba Mulimu; Mulimu ki sibupiwa se si lapelwa. Nali Yomutuna wa Kuyakuile. Mi ku Yena ne ku na ni milelo, ya kuba Ndate, kuli abe Mupulusi, kuli abe Mufolisi. Mi cwale, kana Na ka kona cwani pili . . . Nana ni kuba Ndate, kakuli si paka kuli Nali Ndate, kono Yena upila anosi. Ki yena anosi ya sa shwi. Mi, cwale, kono milelo ya Hae ina ni ku bonahazwa.

⁵⁰ Cwale, kuba Mupulusi, ku lukela kuba sika se si latehile. Mi Mulimu hakoni ku latehisa sika ka kulata mi ni ku si liulula. Haikoni kuba zende ka kukena kwa Hae ni katulo ya Hae yetuna. Kono Na beile mutu fa tukuluho ya buketelo, ka kuziba kuli mutu na ka wa. Mi ku zeo, he, Na tiloba mutu, Yena kasibili, kuli a liulule mutu yana wile. Kona libaka Jesu hanali Emanuele. Haiba Mulimu na ka luma mutu usili kwanda Hae, kona kuli seo ne si si ke kuba hande. Mulimu nana ni kutaha yena Kasibili ni kunga sibaka. Mi Mulimu na si ka taha ka Moya ni kunga sibaka, Nana ni kuezwa nama, mwa nama ya Mwana Hae Tota ya kona kubupa.

⁵¹ Mi Na bonisize fa, kwa simuluho, kuli tato ya Hae ye petehile neli kubupa mutu mwa liluli la lifasi. Kono, mwa bona, Na lumelelize foso kuli atiswe. Na si ka bata kuli bana ba pepwange ka foso, kono ne ku lumelelizwe, zeo mane li ka fela cwanoñu faa.

⁵² Cwale lu fumana kuli Moabi neli wa mwa bucwani, ka—ka kukala, kakuli nali mwana Lota, ka mwana hae wa musizana. Cwale mulemuhe, sina keleke ya nama, Moabi u yemela keleke ya—ya nama, Moabi wa yemela, ni Isilaele, keleke ya moya. Cwale, Isilaele, yena munyaliwa, neli yena...ya yemela baba biziizwe.

⁵³ Keleke yona Kasibili, linzwi la kuli *keleke* litalusa “kubizezwa kwande, kuzwela kwande,” bani baba zwile. “Amuzwe ku yena, sicaba sa Ka! Mu kauhane, kubulela Mulena, mi Ni ka mi amuhela na Luli. Musike mwa swala ze masila za bona.” Keleke ya Mulimu i bizelizwe kwande a lifasi, kuzwa mwa butata bwa lifasi. Ha mu sa li ba lifasi ni kamuta.

⁵⁴ Sina hane Ni lika kubulela, busihu bobuñwi, ku mina, ki ha u ziba kuli una ni swalele ya—ya kuliululwa kwa hao kwa Kuyakuile ona fa cwale mwahali ku wena, ka kolobezo ya Moya o Kenile, u ku file kale bupilo. Mu zuhile ni Yena cwale, mi lu inzi hamoho mwa libaka za Mahalimu, ku Kreste Jesu. Mwabona, fo he kipeto ha mu sa li ba lifasi ni kamuta. Haiba mu lata lifasi, mi litakazo za mina i sa li mwa lika za lifasi, konakuli lilato la Mulimu mane haliyo ku mina. Mwabona? Lu zwile, lu lukuluhile kwa lifasi. Hakusana takazo hape.

⁵⁵ Mwa Maheberu, Na lumela kauhanyo ya 10, iize, “Nekuna ni kupuzo ya sibi ka kamita, mwaha ni mwaha, mibili ya libatana yani ye ne talekwa. Kono mwa taba ye, mulapeli ha sa swalezwi hasana lizwalo la sibi, hakusana takazo ya sibi.” Taba yateni kaufela i zwile ku wena, kakuli u filwe mata a pilisa kutaha mwa Bupilo bo bunca.

⁵⁶ Mi cwale keleke ya nama ki sikuwata fela sa batu mwa likopano, baba i kopanyize. Haisali nto isili... Mane ha ni swaneli ku ibiza kuli “keleke.” Ha ni tabeli ku i biza cwalo.

Ni tabela kuibiza kuli ki “malobalo” a baenyi, malobalo a ba Methodist, malobalo aba Baptist, malobalo aba Pentekota.

⁵⁷ Kono Keleke ki bupilo bo bu pepilwe sinca bobuli ku Kreste Jesu, zeo ki libupiwa zenca. Mi kacwalo lu sa bona cwalo, kuli Mulimu ubuluka Linzwi la Hae.

⁵⁸ Cwale Moabi na boni, Moabi na talimile fafasi mwa simu ni kubona Mulimu inza zamaya mwahala sicaba se bene ba si nihaiba naha ya ku ongaonga. Ne basweli fela ku ikukanelia fela, kuzwa sibaka se ku ya ku sesiñwi. Kono taba yenca, ki kuli, ba taha mwahala linaha ze mi ba li hapa. Likia kaufela nelili mwa musipili wa zona, ne ba li lwezi. Cwale, ba fumana kuli, Moabi na li talimezi, Balaki, atalima fafasi fa naha ya Isilaele, mi ki hali, “Sicaba si apesa lifasi kaufela.” Ki hali, “Mi ba fula linaha, mane inge komu ye fula bucwanii.”

⁵⁹ Mi ba fumana kuli, iliñwi ya litaba za butokwa neli kuli mo ne ba amuhelezi sinulo tuna ye, nekuna ni mupolofita mwahala bona. Neba na ni mupolofita, cwale, yomuñwi yana ba etelezi. Ne si mulao wa ipangezi mutu sina mwa na twaezi, lindumeleti za—za hae hamoho ni yena, ni zeñwi cwalo, kono ki . . . ni baika ba hae, kono nebana ni—ni mueteleli, mueteleli ya bizizwe wa Bulapeli.

⁶⁰ Mi, oh, ha ki lizazi kwa kutomolisa pilu ni leo, fani keleke ya lifasi ha ne itokwile zamaiso za Bulapeli bwa Moya o Kenile, ni kuamuhela bishopu kamba sika kaufela kuli ange sibaka sa Sona. Neli lizazi le li tomolisa pilu. Moya o Kenile una ni kuba mueteleli wa keleke. U lumilwe ku to paka Manzwi a Jesu Kreste, kuli keleke ipile sina mo ne i pilela kwa simuluhoo.

⁶¹ Ha ki kale hahulu, sikolo se si zibahala hahulu kwanu mwa—mwa muleneñi wo, ki mukopano wa za bulapeli. Mi bana ni u limuñwi mwa Phoenix. Mi alimuñwi wa baana, kamba alimuñwi wa baituti ba sikolo, yani, ataha ku na mi ali, “Lwa lata wena, Muzwale Branham. Haluna sika se lu ku nyaza, mane hakuna, kono lutabela fela ku ku otolola hande.”

⁶² Mi se Nili, “Kihande, Ni bata ku sikullwa hande.” Kacwalo, mi kacwalo se Nili, “Haiba Ni fosa, Hani lati ku fosa; Ni bulela kwa batu babañata hahulu.”

⁶³ Mi ki hali, “Kihande, ki bo butata bwa hao.” Ali, “U lika kuzibahalisa, kamba kupilisa hape, bulapeli bwa baapositola. Kanti, bulapeli bwa baapositola ne bufelile ni baapositola.”

Mi se Nili, “Eeni, sha.” Se nili, “Kihande, cwale haiba . . .”

Ki hali, “Cwale, Hani koni ku ku kananisa ka zeo.”

⁶⁴ Se nili, “Na hanikoni nina. Halu swaneli. Ha lu lukeli kueza cwalo. Lu mizwale.”

Mi ki hali, “Kihande,” ki hali, “Ni tabela fela ku kutusa.”

Se nili, “Na itakaleza ku amuhela tuso luli.”

Mi ki hali, "Cwale, mwa bona," ki hali, "cwale ki...yeo ki niti."

⁶⁵ Mi se Nili, "Cwale, ka kubulela, ha lu lukeli kuitusisa buka zeñozwi ki batu basili." Se nili, "Ha nina kuitusisa ya ka," mi Ne ni sina yeñwi kwanda Ye. Kono kacwalo—kacwalo se Nili, "Hanina kuitusisa buka ye bañozi basili, ki Bibele fela. Ni, wena, lu itusise fela Bibele."

Ki hali, "Ku lukile."

⁶⁶ Se nili, "Cwale, lu lumela kuli keleke ya buapositola ikalezi ka Lizazi la Pentekota. Kana wa lumelelana ni zeo?"

Ki hali, "Eeni, Na lumela."

⁶⁷ Se nili, "Cwale lu lemuha kuli Mulimu na file mata a keleke kwani, kwa muzamao wa baapositola wo."

⁶⁸ Ki hali, "Eeni, wani neli muinelo wa Keleke. Cwale Keleke itomilwe kale ka sikuka, mi luna ni balisana ba luna kaufela, ni likopano za luna zetuna ni lika zeñwi. Halutokwi lika zeo ni hanyinyani, kuli lu hohe sicaba."

⁶⁹ Se nili, "Cwale kana Bibele ibulela kai zeo?" Se nili, "U ni bulelele fo i bulelezi zeo Bibebe." Mwabona?

Mi ki hali, "Kihande, ha i buleli cwalo ka nzila yeo."

⁷⁰ Se nili, "Kihande, kanti, Hani koni ku i amuhela konji haiba ibulela fela ka nzila yeo, mwabona. Mwabona?" Se nili, "Luna lu..." Se nili, "Cwalo kona mo ku lukela kubela." Se nili, "Kana u lumela kuli Mulimu u sa biza sicaba?"

Ki hali, "Eeni, sha."

⁷¹ Se nili, "Cwale u ka lumela kuli Bibebe i lukile, kalabo kaufela?"

"Eehe."

⁷² Se nili, "Cwale, mubuleli ka Lizazi la Pentekota, neli Pitrosi, yana na ni linotolo za Mubuso."

"Yeo ki niti."

⁷³ Mi se Nili, "Cwale, seo keto ya hae kaufela neili yona, Jesu naize, 'Se mu ka tama mwa lifasi, Ni ka si tama mwa Lihalimu; se mu ka tamulula mwa lifasi, Ni ka si tamulula mwa Lihalimu.'"

Ki hali, "Ni ka lumela cwalo."

⁷⁴ Se nili, "Cwale, mwa Likezo kauhanyo ya 2 ni timana ya 38, Pitrosi naize kwa batu bani bene ba komoka batu ba ba bulela ka malimi asili, mi ba mu buza ze ne ba ka eza kuli ba piliswe, mi ki hali, 'Mubake, mañi ni mañi wa mina, mi mu kolobezwe ka Libizo la Jesu Kreste kwa swalelo ya libi, mu ka amuhela mpo ya Moya o Kenile; Kakuli sepiso yeo i ezelizwe mina, ni bana ba mina, ni babali kwahule kaufela, mane ni babañata be Mulena Mulimu wa luna uka biza.' Cwale haiba Mulimu u sa biza, konakuli ona sepiso yeswana yani ki ya bona."

⁷⁵ Kihande, ataha kwanu mi nali ni alimuñwi wa likwata za Billy Graham kwanu inza lapelela kwa mukopano. Mi sikhata sa bona ne si inzi kwani kwa California kokuñwi, lisunda nyana zefitile, mwa litapelo zetungile luli, aipile ku Mulimu, ni kuitima lico, mi Moya o Kenile wa wela fa sikhata sani kaufela mi ba kala kubulela lipuo lisili. Mi . . . Uh-huh.

⁷⁶ Cwale ki membala wa—wa keleke ya Balikani baluna, ba Assemblies of God mwa Tucson, Arizona. Ki hali, “Oh, Muzwale Branham, Ni yanga kwani mane ni ikutwa hande luli!” Ali, “Ni nalula fela mazoho aka, mi,” nili, “kanya ya Mulimu! Na opela fela!” Mi ali, “Ne ni si ke kueza cwalo mwa keleke ya ba New Testament Baptist.”

Se nili, “Na bona ha u koni. Kona ha u zwile.” Eehe.

⁷⁷ Kacwalo ki fo he cwale, mwabona, Mulimu ubuluka Linzwi la Hae. Sa Na bulela, Uka si eza. Mulimu una ni kubuluka Linzwi la Hae.

⁷⁸ Cwale lufumana cwana fa, kuli, malikanyiso a butu ana nani Moabi aa. Na boni mupolofita yo mwahala Isilaele, yana kona kufuyola, kukuta, kuzamaisa, ni zeñwi cwalo, kacwalo u lika ku li tamahanya, ka litaba za naha.

⁷⁹ Cwale zeo kona ze ezahala fela mwa likeleke kacenu. Ba likile ku li likanyisa ka mulao omuñwi. Hamukoni kueza cwalo.

⁸⁰ Moya o Kenile ulukela kuba ya pila mwa Keleke, kamita, ku unzo etelela Keleke mwa lusika lo U pila ku yona, ili kupaka Linzwi le li sepiselizwe lusika lwateni. Mulimu na bulezi Linzwi, kuzwa kwa simuluho, ni zeñata hahulu za lusika *lo*, ni zeñata hahulu za lusika *lwani*, ni zeñwi cwalo za masika *ani*. Kamita ku ezahalanga fela ona cwalo. Mi, mwabona, mi Moya o Kenile una ni kuba o pila mwa Keleke, kuli Keleke ye ipile mwa lizazi la Yona. U lukela kuba fa kacenu, ku to paka bulumiwa bwa lizazi la maungulo le, lisupo za lizazi la maungulo, lizazi la Moya o Kenile. Una ni fela kuba fa kuli ueze ona cwalo, mi ha mukoni kuba ni ona ka kubelekisa milao lao. Mulimu una ni mulao. Ki Yena Ya lufile Moya o Kenile.

⁸¹ Cwale, lu lemuha fa kuli Mushe nana ni Mulena, mi Mulena yani neli Mulimu, ya na mu tozize. Mi ni Balami hape nali mwatasa mulena, Balaki. Mi ne li nto yeswana ni buino bwa naha, mwabona, Balaki. Balami, mupolofita wa Mulimu, naile ku Balaki fa zibiso ya hae. Mushe naile ku Mulimu kwa kuba ni zibiso. Yeo kona ye ne li shutano.

⁸² Ibo, sibeli sa bona neli bapolofita, kakuli sibeli sa bona ne ba biziwe ki Mulimu; sibeli sa bona neba kopani ni Mulimu, sibeli sa bona neba ambola ku Mulimu, mi sibeli sa bona ne ba batezi Moya. Cwale Na shetumuka mwabona. Cwale, sibeli sa bona neli baana babatezi Moya. Cwale, yeo ki niti. Bibebe ibulezi kuli, “Mulimu na kopani ni Balami mi abulela ni yena.” Mwabona?

⁸³ Kacwalo lwa lemuha, yeñwi ni yeñwi ya bapolofita ba, bubeli bwa bona ka kuba bapolofita, baana ba Mulimu, ne ba tiyela fa mayemo a bona. Mushe na tiyela ku Mulimu. Mi Balami fa na tiyela ku Balaki.

⁸⁴ Mulemuhe fa, ka ku swanisisa ku za moya ni za nama, mo ne li bezi ze petehile. Mushe, na lumilwe ki Mulimu, mwa sibaka sa musebezi, u kopana ni muuna usili wa Mulimu. Kana mwakona ku nahana ze cwalo?

⁸⁵ Kono mutualime buino bwa naha bone ba nani kwani. Neli naha ye ongaongilwe.

⁸⁶ Mi Mushe na zamaisa bana ba Isilaele, inge fela Mulimu mwa na ka ba bulelala kwa kuya, ku zamaiswa ka Siita sa Mulilo, ni Sibupiwa sa buipiteli sene si etelela mwa nzila. Mi Mushe na amuhela zibiso ya hae ka—ka Logos, eni sha, lani ne li zwa ku Mulimu, ona Siita sa Mulilo sani; lene lili Lingeloi la Bulikani, yeneli Kreste, yena Ya Tozizwe. Mi na sweli kuisa liñusa la hae Kwani, ni ku lifa kwa bana ba Isilaele, mwa musipili kuya kwa naha ya sepiso.

⁸⁷ Kono muuna yo na ikinezi mwa kozo, mi nana ni mubuso wa hae. Nana ni likeleke za hae. Nana ni lika kaufela hande mwateñi ka swanelo. Kacwalo a luma ku to nga muuna yo, kuli atahé ku to kuta sicaba se. Mi mulemuhe, munahane fela, kuli mupolofita alimuñwi, muuna alimuñwi wa Mulimu a bona misebezi ya Mulimu ni mutu usili, ni kulika ku—ku lwanisa misebezi ya Mulimu, kanti na ziba, na lukela kuziba hande. Cwale Balami, pili fani... . Balaki a mu lumela mi amu bulelala kuli, “Taha u to kuta sicaba se.” Cwale Balaki a eza nto yeswana, kamba... .

⁸⁸ Balami, nitaluse, na ezize lika ze lukile, na batile Mulimu. Na batile Mulimu, pili. Cwale, sani kona sa na lukela kueza.

⁸⁹ Mi cwale Mulimu amufa kalabo ya Hae ye petehile, ye kenile, “Usike wa ya ni yena! Ba tuhele. Usike wa kuta sicaba sani. Ba fuyozwi.” Cwale, seo si lukela kuba hahulu ka buñata. Mi Mulimu ha bulela sika, Hakoni ku si cinca. Mulemuhe, tato ya Hae ye petehile neli kuli, “Usike wa ya! Usike wa lwanisa sicaba sani. Ki sicaba sa Ka.” Yani neli tato ya Hae ye petehile.

⁹⁰ Kono Balami na sa lati batu bani, ka kukala. Mwabona, ki fo he cwale. Ki babakai bo Balami bo lu nani kacenu? Taba yeswana, taba yeswana! Ba ziba hande.

⁹¹ Neba na ni bona mwa mazazi a Mulena luna Jesu. Nekudema ataha mi ali, “Muluti, lu ziba kuli U Muuna ya lumilwe ki Mulimu, kamba—kamba, u Muluti ya lumilwe ki Mulimu. Hakuna mutu ya kona kueza lika Zo eza konji Mulimu ali ni yena.” Mwabona, ne ba ziba cwalo. Nekuna ni Balami hape, mwabona.

⁹² Cwale, Balami na sa lati sicaba. Mulemuhe nkambe ya hae. Kasamulaho bamano luma baana ba bande kwani, ku to mu bulelela kuli, "Cwale kuna ni batu babañwi ba ba taha kwanu. Mi Ni utwisisa kuli u mupolofita, u mutu yomutuna, kacwalo taha kwanu u to ni kutela sicaba se."

⁹³ Balami ali, "Cwale, libelela fa muzuzu, kufitela Ni kena ku yo lapela, ni kuina busihu kaufela, mwendi Mulena uka ni katanyeza mi Uka ni bulelela." Ku lukile, habusa, Mulena a kopana ni yena mi ali, "Usike wa ya! Usike wa kuta sicaba sani. Si fuyozwi."

⁹⁴ Ku lukile, Balami a zwela kwande mi ali, "Kihande, Hani koni kuya, kakuli Mulena na ni bulelezi kuli nisike naya."

⁹⁵ Cwale mulemuhe hane ba kutile, ni kunga nkambe ya yona, kuli yena aye kwani a yo tuhelisa mukopano o ne banani, mwa bona, kihande, he, mu lemuhe kuil, nkambe ya luma sikhata se sinde sa baika baba kutekeha, mwendi ki bishopu, mutu usili fela, kamba ikona kuba muokameli wa puteho, mutu yomuñwi a lumiwa kwani, "Mu mu bulelele kuli aye ayo tuhela zeo ni hakuli cwalo!" Mwabona?

⁹⁶ Mulemuhe, sikhata sa hae se si mata, limpo zende, masheleñi amañata, ali, "Na kona ku ku hulisa kuba fa situlo sesinde. Na kona ku ku panga wena, kufita kuba fela mutu wa fela fela, Na kona ku kueza kuba ya pahami nyana cwale. Nina ni tukelo ya kueza cwalo, kakuli Ni mulena kwanu mwa muzamao tuna woo. Mi Na—Na kona ku ku ezeza sika hande, haiba uka eza fela cwalo."

⁹⁷ Mulemuhe, mpo yenca ne i mu foufalyze. Na lukela kuziba; sa na bulezi Mulimu, Mulimu uka si eza. Kono ne li mu foufalyze. Mi kakuba mupolofita wa Mulimu, na sa lukeli ku susumezwa ki sikhata se si cwalo. Na lukela kuzwa mwa sikhata sani, ka kukala.

⁹⁸ Mi haiba Ni ambola kwa baana ba bañwi ba Mulimu mo, ha ba lika ku mi bulelela kwa nkambe yetuna, kuli, "Mazazi a limakazo a felile," mi se se lueza fa, mi Mulena Jesu wa lu fuyola, "mi sani ki sona sikhata sa bafitelezi ba tumelo, kusebeza ni maikuto, hakuna sika sa kuli foliso ya Bumulimu," zwa mwa sikhata seo, ona foo. [Muzwale Branham uliza munwana wa hae—Mu.] Muzwe ku zona, kakuli Ki Linzwi la Mulimu le li bonahalile. Ba li, "Hakuna nto yecwalo kuli mazazi a ba apositola. Hakuna kolobezo ya Moya o Kenile. Kubulela ka malimi koo, hakuna sika ku zona mwateni."

⁹⁹ Oh, kono, muzwale, usike wa teezeza ku zeo! Kuna ni babañata baba swana sina Balami, kacenu, baba inzi kwa mulaho mwa ofisi ya bona, ba bala Libuka za Bibele ze ni kuziba kuli Ki Niti. Kono niteñi bakeñisa fela buino bwa situlo, habana kunga mayemo a bona. Ka swanelo fela. Mulemuhe, Mulimu... Na zibile kuli na sa lukeli kuba mwa sikhata se, kusi cwalo

Balami na lukela ku ziba cwalo. Bona, ba zwa mwa tato ya Mulimu. Balikani bani ba ka ku bulelela kuzwa mwa tato ya Mulimu. Ha u fumana tato ya Mulimu, usike wa lumeleza mutu ku ku kelusa ku yona.

¹⁰⁰ Ni zibile batu ba bande, ba batahangwa kwa mikopano, ba foliswa, ni kukuta. Mi ba bulela kuli, “Oh, kihande, hakuna sika ku sani. U ikutwisa fela. Hakuna se sili ku zona.” Mi kipeto sicaba sa kakanya. Ni boni sicaba ha si taha mi si amuhela Kreste mwa lipilu za sona, ha si kuta; mwendi si bulela ka malimi, ni kukuta. Mi keleke ika bulela kuli, “Kiñi, wena u—u maswabisa kwa Bukreste,” ni zeñwi cwalo. Mi, oh, mawi, usike—usike wa eza cwalo, mwabona. Zwa mwa sikwata sani! U pile kwahule ni zeo.

¹⁰¹ Mulemuhe, Balami na itusisize liñolo la buikangabeki fa, bakeñisa lizwalo la hae, mwabona. Ki hali, “Hakulata. Libeleta busihu bobuñwi, mi mwendi Ni ka buza Mulimu, mwa bona. Mwendi U ka cinca muhupulo wa Hae.”

¹⁰² Kono Mulimu ha cinci mulelo wa Hae. Fani Mulimu ha na lufile mubulelelo wa kolobezo ya Moya o Kenile, ka Lizazi la Pentekota, cwalo kona Mwa lukela ku libulukela ona cwalo. Na ezize mwahala lusika lwa Bibebe kaufela, mi Ukana a eza ka nako yeñwi kaufela yeo mutu aka taha ka mayemo a Na file kwani. Haiba u taha, ka kulumela, kubaka, ni ku kolobezwa ka Libizo la Jesu Kreste kwa swalelo ya libi za hao, ni kulumela ku Mulimu, Mulimu utamehile kutaleleza munwelo wa mulyani woo, kiniti, kakuli ki Yena dokota. Mi Uka li taleleza haiba uka—haiba uka utwela.

¹⁰³ Kono ha ukoni cwale kulika kunga munwelo wa mulyani woo, ku muisa ku mulekisi wa milyani yomuñwi yasa zibi za eza yana—yana ka beya sesiñwi ku ona. Ya kona ku bulaya mukuli. Kona ha lu na ni ma membala babañata hahulu baba shwile kacenu, balika kufa mulyani o fosahalile. Mulimu una ni munwelo wa mulyani ona mwa Bibebe mo. Yena wa swana maabani, kacenu, ni kuyakuile. U lukela kunwa mulyani ka mwa na bulelezi Dokota kuli u nwe.

¹⁰⁴ Bibebe ibulezi kuli, “Kana hakuna—hakuna mulyani mwa Giliadi; kikuli hakuna ñaka mwateni?” Kakuli, kuna ni zeo. Ali, “Cwale kiñi mwana ka wa musizana wa sicaba sa Ka ha li mwa buino boo?”

¹⁰⁵ Mwabona, luna ni Bibebe. Luna ni Ñaka. Zeo, fela, bapangi ba milyani basweli ku keshebisa munwelo wa Mañolo. Sani kona seo sili sona. Mulika kubulela kuli, “Mazazi a limakazo a felile. Hakuna nto ya kuli kolobezo ya Moya o Kenile ni lika ze kaufela. Ki bukuba.” Bibebe i lukile luli. Mulimu ha kutisi sa bulezi kaufela. Mi balika ku itusisa nzila ya buikangabeki, nto yeñwi cwalo, “Kihande, lwa lumela cwalo.” Kihande, hakuna taba ka so lumela!

¹⁰⁶ Ki sa na bulezi Mulimu! Na ize, “Ni ka sulula Moya wa Ka fahalimwa libupiwa kaufela.” Na sepi size seo mwa mazazi a maungulo.

¹⁰⁷ Balika kubulela mikopano, ye mubona, ba ni biza kuli, “munuhi, ki—ki—ki munuhi ya ipitezi, kamba ki—kamba Baalezebubi, kamba ki diabulosi yomuñwi.” Kihande, bana ni kubulela cwalo, kakuli ba zwa ku ndata bona. Sani kona sa na bulezi ka Jesu kwa simuluho. Mi ha ki luna baba eza se, nihakuli cwalo, ki Jesu yaswana, kakulki yena Wa swana maabani, kacenu, ni kuyakuile. Ki Moya wa Hae.

¹⁰⁸ Oh, sika se si kcona kufita, kufitelela ni kut-... kufitelela tumo ya Hae. Kacwalo batu babañata balika kufitelela sani. “Oh, taha u to ikopanya kwa keleke, mi ku kaba hande. Lu keleke ya kale. Lubile kwanu ka myaha yemiñata. Ne lu kalile...” Eeni, yeo ki niti. Haiba ku cwalo, konakuli keleke ya Katolika ya Roma ina ni zona mwahala mina kaufela; ki bona bapili kwa likopano. Nebali ba pili. Kono, muhupule, isiñi Keleke yapili. Ne ba li kopano ya pili, mi ki mahe wa zona kaufela. Zeo, mane ifi ni ifi ya zona ya shutana ku Mulimu. Sinulo 17 ibulela taba yeswana, mwabona. Eeni, lu mwa mazazi a maungulo. Cwale, muhupule, Mulimu uka mi lumeleza, niteñi, mwabona, cwale.

Mi cwale Balami, a hupula kuli, “Kihande?”

¹⁰⁹ Mi Mulimu amu bulelela kuli, “Zwelapili zamaya.” Kiñi? Mulimu na ziba sene sili mwa pilu ya hae. Mulimu na zibile kuli sani nesili mwa pilu ya hae ka kukala, kacwalo A mu bulelela kuli, “Zwelapili zamaya.” Uka li lumeleza. Uka ku lumeleza kueza cwalo. Uka ku fuyola, linako zeñata, ka kueza cwalo.

¹¹⁰ Na fuyozi nihaiba Isilaele kasamulaho bamano... Muhau no so bafile kale mupolofita, Siita sa Mulilo, tukuluho, lisupo ni ze komokisa, za ba zwisa mwa Egepita, ni lika kaufela, kono niteñi ne ba bata mulao. Mulimu na ba lumelelize kuba ni zona, kono ne linze li ba kuta ka nako kaufela.

¹¹¹ Na tuhelezi Balami kuzwelapili ona cwalo mwa na lukela kubela, kono ki sikamañi sa na ezize? Aya kwani mi, kufita kuli a kute sicaba, na na ni ku fuyola sicaba. Na si ka kuta sa na fuyozi Mulimu.

¹¹² Mi Ni—Ni mi bulelezi, kuli ni ka tuhela ka naini. Mi Na talima mwahalimu, mi seli nako cwale, mi Ni na ni buka yetezi litaba zeñozwi faa.

¹¹³ Kono Ni bata kubulela cwana, ka kukwala, kuli Mulimu na si ka cinca muhupulo wa Hae. Taelo ya Hae neli kuli Balami asi ke aya. Mi cwale Mulimu ha bulela sika, si na ni kusiyala ona cwalo kuba niti.

¹¹⁴ Cwale, Bibele iize, “Jesu Kreste ki ya swana maabani, kacenu, ni kuyakuile.” Cwale, seo ha si talusi kuba “ka nzila yeñwi.” Sani si talusa kuli Yena wa swana maabani, kacenu, ni

kuyakuile! Jesu naize, ku Muñoli Joani 14:12, "Ya lumela ku Na, misebezi ye Ni eza uka ieza ni yena." Kana ku cwalo? Na sepisize, mwa Mareka 16, "Lisupo ze li ka latelela baba lumela."

Ba li, "Kihande, zeo neli fela za baapositolata."

¹¹⁵ Mi ali, "Muye mwa lifasi kaufela mu kutaze Evangeli kwa libupiwa kaufela. Lisupo ze li ka ba latelela, mwa lifasi kaufela, ni kwa libupiwa kaufela. Ka Libizo la Ka ba ka leleka mioya yemaswe. Ba ka bulela ka lipuo zenza. Ha ba ka swala linoha, kamba kunwa lifanu, halina ku ba tiseza kozi. Ha ba ka beya mazoho a bona fa bakuli, bao ba ka foliswa." Cwale, zeo kona linepo za Hae.

¹¹⁶ Mwabona, lu lika ku lumba sika. Lu lika kueza, kububeka keleke ku se lunahana kuli kona Linzwi la Mulimu. Ha lukoni ku swanelia kwa keleke. Lu lukela ku swanelia ku Mulimu.

¹¹⁷ Ni bile ni bulelanga kamita za nako yetuna ya kuswanisisa teñi. U penta mahatelo a hao bufubelu, kakuli uboni muyaha tuko wa hao u pentile mahatelo bufubelu. Mina basalio babañwi mutinanga kuwani ya mufuta omuñwi, kwa keleke, kakuli mubona basali inge baeza cwalo.

¹¹⁸ Musala Bo. Jacqueline Kennedy na kutile milili ya hae ka mukutelo obizwa water-head, mane basali kaufela ba likanyisa. Na tinanga masila a kale a masaka cwalo, kamba lika ze cwalo, ki nto ye masila kuli musali abe mwa mukwakwa, ni lika ze sweli cwalo. Mutualime basali kaufela baeza lika zeswana. Ki malikanyiso, kono zeo li mwa lifasi. Batu ba keleke ba li kopisize, mi ki maswabiswa ha ba li eza. Ku fosahalile kuli baeze cwalo, mi ki maswabiswa. Mi ha lu libona likena mwa Pentekota, ki zetiseza hahulu maswabiswa. Yeo ki niti. Kono, Mwa bona, keleke ya li likanyisa ni ku li lumeleza kuzwelapili.

¹¹⁹ Cwale, haluna taba. Ha ni bilaeli kamba koti yaka ya zamaelela mibala ni malukwe aka, kamba liyebela la ka la zamaelela mibala ni koti yaka. Ni bata kutwisiso yaka kuli iswane ni Bibele ya Mulimu ni ze tokwahala za Hae. Mi sani kona se lu lukela kueza luna batu ba pentekota, ki kuba ni kutwisiso ya luna inge fela mone ibezi yabona, kakuli Yena ki Jesu ya swana, ona Moya o Kenile oswana, ona mata aswana. Wa pila kacenu, mi U pila mwahala luna.

¹²⁰ Si ni hupulisa ka zazi leliñwi bo Mahe ne ba zwile mwa Jerusalema, kuzwa mwa milapelo, ni ndatahe wa mutose, Josefa. Mi ba ya musipili wa mazazi amalalu, ba nze ba akaleza kuli Nali ni bona, mi ba fumana kuli Na li si yo.

¹²¹ Mi, mwa ziba, Ni bata ku swanisisa sani kacenu. Mwa ziba, keleke ibile ni musipili wa maneku amalalu. Luther, Wesley, pentekota; musipili wa maneku amalalu. Mulimu u ka bafa liñusa, kuluka, Luther, na swalelezi ku lona; mi kwa taha kukeniswa ka Wesley; kona kutaha kolobezo ya Moya o Kenile, ni ba pentekota. Mi Ha ni zibi haiba ha lu si ka zwela kwande a

bunyemi bobutuna kokuñwi, kuli luicahele lika zetuna ni kueza lika zetuna, sina Balami mwa na bezi ni zona mwa munahano; likopano zetuna, ze—ze ne fitelela zeñwi, ni *ye* ka butuna, kutisa limpo za gauda ni linepo zetuna kuba Sunday school ni baba kona kutisa mwateni ma membala babañata, ni ku kenya sika kaufela mwa keleke.

¹²² Na mi bulelela, kuna ni Keleke iliñwi mo ku sina muipi, yeo kona Keleke ya Mulena Jesu Kreste, ye kolobelizwe ka Moya o Kenile. Mwateni ha u hapelezwi Teñi. U pepwa mwateni Mwani. U lumilwe Mwani ka Moya o Kenile.

¹²³ Ba fumana kuli, mushemi a fumana kuli Na si yo mwahala bona.

¹²⁴ Cwale mwa hola ye, butata bobutuna bo bukalile, ha lu ziba kuli naha ye ya zikinyeha. Isiñi fela naha, kono lifasi la mutumbi la njanja. Li kwa nako ya maungulo. Hakuna sika sesiñwi se Ni ziba kuezahala kwanda Kungelwa, ili Kutaha kwa Mulena Jesu Kreste. Kaufela li lukile.

¹²⁵ Mi lwa bona likundi ze. Oh, mube ni bunde kaufela, mukopano otaha wo, muzuse lika kaufela ku ona mwakona ze mukona kuba ni zona, ze li za Mulimu. Haiba hauna Moya o Kenile, ubeye fela mwa munahano wa hao kuli hauna ku zwa mo usika u si ka U amuhela kale. Yani kona nzila ya kueza lika ka yona. Uine ona fo, kakuli wena . . . ye ki, ikona kuba kolo ya hao ya mafelelezo. Ha ku koni kuba mukopano omuñwi kwa Likamba la Wiko hakulata. Ikona kuba mwataswa liwate, ka nako yani, ku si kaba kale omuñwi. Kacwalo ha lu zibi ze kona ku ezahala, kacwalo luna . . . Lu libelezi katulo ya Mulimu kutaha mwa linaha.

¹²⁶ Cwale Ni bulele cwana. Ne ba hupula kuli Nali ni bona. Kono ba fumana kuli, mwa ziyezi, kuli Na si yo. Mwabona, Na si ni bona.

¹²⁷ Cwale lu fumana cwana, kuli mwa nako yeo sika sesituna se ha si tahile, mi lu fumana kuli lu latehisa sika sesiñwi mwa likeleke za luna, mi ani ki mata a Kreste.

¹²⁸ Cwale, mutualime, Ha ni lati ku mi lwanisa. Na mi lata, mi lilato la niti, lilato la niti kamita la sikulula. Cwale lu tokwile Kreste mwa keleke ya luna. Lu tokwile Kreste mwa sicaba sa luna sa Pentekota, muzwale wa luna ni likezel. Kuna ni se si fosahalile. Mikopano ya litapelo za kale yene ba banga ni yona, musihali kaufela ni busihu, ha ba sa na yona ni kamuta. Bahame ba luna ne ba banga ni milili yemitelele; ha ba sana yona ni hanyinyani. Ikona kuba maswabiswa kuli basali baipente ni kuitusisa mipende, kwa mazazi a kwa mulaho, ni kueza mo ba ezeza basali baa. Sesiñwi si fosahalile. Hakuna se si fosahalile ku Kreste, mwabona, kono sesiñwi si fosahalile. Sesiñwi si cwalo kokuñwi. Katala, ne kabanga cwalo, ne ba sa lumelezangi lika ze

cwalo, kono ba li lumeleza cwale. Mwabona, butata bu teni, mi lu tonda nto yeñwi.

¹²⁹ Lu tondahala mata e lu lukela kuba ni ona, ko ku lukela kuba mushini omutuna, ni lisupo zetuna ni ze komokisa. Kihande, muyaho wo u lukela kuba otezi hahulu mata a Mulimu, cwale, kufitela mueza libi apalelwia kuina mo; Moya o Kenile u li nyaze, kapili fela ona cwalo, sina Ananiasi ni Safira. Mi lu tonda nto yeñwi.

¹³⁰ Cwale ki sikamañi se si ezahalile? Ne ba yo Mu bata, mwahala balikani ba hae, mi ne ba si ka Mu fumana mwahala balikani ba hae. Kona kuli ne ba Mu fumani kai? Ona ko ne ba Mu siile.

¹³¹ Mi Ni nahana kuli, keleke yaluna ha i to kena fa muezezo wa busuleni wa likopano o lubile ni ona oo, alimuñwi nana ni kuzwa ku yomuñwi, mi nana ni kuba ni likeleke zetuna, ni sikhata sesinde sa batu, ni batu ba ba apala hande, ni baopeli babande, ni kuyema fani mi . . .

¹³² Na lata kuopela kokunde. Na lata muopelelo wa kale wa pentekota. Kono ha Ni koni kuyemela lika zani, zeo fela ha li zamaeleli ni na; kubuyela ka lisino fa kuopela kufitela ubonahala mubala wa bundilu fa sifateho, kuli fela u utwahale. Ni—Ni lumela mwa kuopela kuzwelela mwa pilu ya hao, mwa Moya wa Mulimu, sina mo ne Ni utwezi kwanu nako nyana yefitile. Mwabona?

¹³³ Na tabalela muhuweloo wa mufuta wa kale, kono Ni nahana kuli kuhuwa kwa kona kuzwelapili haibile fela lipina za lila kamba ha li liziwi. Moya wa Mulimu fa sicaba, kona O tisa limbuyoti ni mata a Mulimu. Ni lumela kuli mutu wakona kupaka, ni kuopela ni kulumba Mulimu, kwa musebezi wa hae, kamba kaufela kwa inzi. Luli.

¹³⁴ Mi cwale lu latehisa nto yeñwi. Lu ka Mu fumana kai? Ona kwani ko lu Mu sile, mwa Linzwi.

Ha lu lapeleñi.

¹³⁵ Ndate Yomunde yakwa Lihalimu, leliñwi la masihu aa lu ka kwala Bibele ye nako ya mafelelezo, pina ya mafelelezo ika opelwa, kutazo ya mafelelezo ika kutazwa, mukoloko wa tapelo wa mafelelezo uka bizwa, muezalibi wa mafelelezo uka taha mwateni. Mi cwale ku ka tatama sikamañi? O Mulimu yomunde, halu lati tato ya Hao ya ku hapeleza, Ndate. Halu zamayeñi mwa tato ya Hao ye petehile. Lu si ke fela—fela kunga Linzwi nyana fa ni fani, ni kulika ku Li hapeleza kuzamaelela ni lituto za litumelo kamba za bulapeli, kamba nto isili fela. Lunge Linzwi ka mo Li inezi, kulumela Evangeli yetezi, kaufela za lu lutile Jesu kuli lueze. Ha lu lumeli kuli likezo za baapositola ki muinelo fela wa mubelekelo. Lu lumela kuli Ki Linzwi la Mulimu, Ki likezo za Moya o Kenile wa Hao mwa baapositola. Mi lu lumela kuli ona Moya o Kenile oswana, Mulena, o no tile fahalimwa bona,

kona o no ba konisize kuba mo ne ba ezeza, U ka eza zeszana ni mwahala luna, ha U taha fahalimwa luna, haiba ki Moya o swana.

¹³⁶ Kacwalo Na lapela, Mulimu yomunde, kuli mukopano o lukela kukalisa kamuso kasamulaho wa busihu bo. Ni lapela, Ndate yakwa Lihalimu, kuli ibe mukopano omutuna o muleneñi wo ukile wa ba fateni ni ona, bakenisa Pata ya Hao. Fuyola mubuleli kaufela, O Mulimu, ha kube ka—ka kunyungeha luli, cwale buhali bwa Mulimu bu utwahale kuluma kuzwa fa katala. Mi baeza libi ba ngangame, ba njange. Mi Kubateni kwa Jesu Kreste kutahé ka ku iponahaza hahulu kwa sicaba, kuli bakone fela kukwala meto a bona ni ku Mu bona ha zamaya mwahala bona. Lumeleza cwalo, Mulena.

¹³⁷ Cwale, busihu boo, se si si ka ezahala kale kuli lu lapelela . . . Mulimu Yomunde, babañwi ba bana ba Hao ba kula. Ba se ba holofezi, mi—mi ba na ni likolofalo. Ni tile ku to ba lapelela. Kikuli Uka kuteka se Ni Ku kupa, busihu boo, Mulena, kwa matuku a bona? Na sepa, ku Wena, kuli kutokwe ku ba mutu ya fokola mwa muyaho wo lisebelezo ha se li felile.

¹³⁸ Batanga ba hao mwahali mo kaufela, ba bainzi fande fani, inge bahuwa, inge ba nanula mazoho a bona, ni kwa mulaho fa katala fa, mi ba bulela kuli “amen” kwa Linzwi. Ndate, lu sikhata silisiñwi sa batu. Lu zwile mwa lifasi, kuzwa mwa buino bwa butu bwani, mi lu pepilwe ka Moya. Lwa pila, busihu bwa kacenu. Mi No ize, kakuli Wa pila, lu ka pila ni luna. Mi lwa sepa, Mulena, mi lu lumela ka lipilu za luna kaufela, kuya ka Linzwi, kuli lu yemelwa ku Wena.

¹³⁹ Cwale aku eze Manzwi a Hao kuba a niti, busihu boo, ku to folisa bakuli, sina ha Ni ba lapelela, mi babañwi ni bona ba lapela. Lumeleza, Mulena, kuli ku be cwalo. Mi lu ka Ku lumba ka zona. Lwa kupa ka Libizo la Jesu. Amen.

¹⁴⁰ Cwale . . . [Yomuñwi ukala kubulela ka lulimi lusili. Hakuna manzwi fa tepu—Mu.] Ni Itumezi, Mulimu Ndate.

¹⁴¹ Lu ikutwa cwalo, inge fela nako yeñwi mwa Bibebe, ne ba na ni ndwa yetuna, mi Moya wa Mulena wa wela ku mutu mi A mu bulelela kwa kukoma sila, kwa kuya. Muteeleze ku Seo. Sikuluha ili wena. Mwaboana, Moya wa Bupulo o ku wena, u ku sikulula kutaha kwa Linzwi. Ubone haiba Linzwi la pila ku wena, Li ka Ipilela ili lona hande mwa Linzwi.

¹⁴² Cwale, maabani busihu ne Ni liyehile. Cwale, mu sicaba sesinde hahulu, Na fela . . . Mo ku bonahalela, mi ha Ni kala ku supala, Ni—Ni—Ni lakaza fela kuli kambe Ne ni ka . . . Ni be ni mina kuyakuile, mwa Naha yeñwi.

¹⁴³ Kacwalo he lu ka lapelela bakuli, mi cwale ha Ni na kulika kutisa babañata mwateni ka nako iliñwi, inge mo ne Ni ezelize maabani busihu. Mi cwale, Billy Paul ufile makadi a litapelo, Na

sepa ki libunda mwendi mwanda cwalo. Kana ufile a handeleti, kamba tuu? Mianda yemibeli. Neli taku mañi yani? C.

¹⁴⁴ Ki mañi yana ni C, nombolo yapili? Nanula lizoho la hao, halu boneñi haiba yeo ki niti, cwale. Kadi ya tapelo, mutualime fa kadi ya mina ya tapelo, ina ni nombolo mi ni—mi ni taku fateni. C, nombolo yapili, nanula lizoho la hao. Fahalimu fani. Ku lukile, tuluka utahe kwanu. Nombolo yabubeli, yabulalu, yabune, yabuketalizoho. Cwale, mi, mina, kuna ni ya taha kwanu mi mu swale. Cwale lu bata kuli mañi ni mañi wa makadi a litapelo, kono lu bata kuli ba tahe mwa neku *le* mwa mukoloko. Iliñwi, zepeli, zetalu, zene, zeketalizoho. Ni bona babalalu ba bona. Mi kadi ya hao ya tapelo bo, sha? Yabune. Cwale kuna ni yomuñwi hape? Ketalizoho, kana yani ki yena mutu ya taha kwani? Alimuñwi, bababeli, babalalu, babane, baketalizoho. C, nombolo yapili, yabubeli, yabulalu, yabune, yabuketalizoho. Ku lukile, cwale mutahe fela ka mo li bizezwa, linombolo za mina.

¹⁴⁵ Kacwalo, maabani busihu, Ne ni ba boni kwani, sicaba si putehana ka buñata. Ha lu lati zeo. Ye ki keleke, mwa ziba, ha ki sibaka fela. Kacwalo, luna—luna, muna ni kubuluka mulao.

¹⁴⁶ Iliñwi, yabubeli, yabulalu, yabune, yabuketalizoho, yabusilezi, yabusupa, eiti, naini, lishumi. Cwale ha mu ba beye mwa fela mwa sikuka ha banze ba ya kwa mulaho. Cwale, kadi ya tapelo yabu silezi, supile, eiti, naini, lishumi. Mi yomuñwi uka nanula lizoho la hae ha ba ka . . . ha se ba fitile mwa mukoloko wani. Mi lu ka ba lapelela.

¹⁴⁷ Ki babakai baba ka lumela ni na cwale kuli Mulena Jesu uka eza musebezi omutuna? Ni ka eza kaufela ze Ni kona. Cwale silezi, supile; silezi, supile, eiti, naini, lishumi, ilebene, twelufu, setini, fotini, fifitini.

¹⁴⁸ Cwale amutahe fela, kuli basike ba sinana fela fa sibaka silisiñwi, mwa ziba, ni kupotoloha fateni. Kona linombolo ze li fezwi ku mina, ku mi beya mwa mulao, mwa ziba. Mube kuli kusike kwaba . . . Mi cwale nombolo ya mina ha ibizwa, kihande, mutahe fela ona cwalo. Ku lukile, mi cwale lubata ku . . .

¹⁴⁹ Cwale Ni bata kuli kaufela, mañi ni mañi, kuli lube ka likute luli cwale. Mi lu ka lapelela cwale mwendi, kufitela lukona kunga sicaba se si lapelelwé. Mi ha lu zibi sa ka eza Mulena. Ha lu zibi Sa ka eza. Kono lu Mu kulubela kueza lika zetuna.

¹⁵⁰ Cwale, Na lumela, fifitini, kana Ni na ni bona babañata fani kale? Billy Paul, uinezi kai? Ku lukile. Fifitini, sikisitini, sebentini, eitini, naintini, twenti.

¹⁵¹ Cwale, mwabona, basweli kusinana cwale. Kacwalo cwale Ni kaba ni, mwendi, hakulata ki muzwale cwalo, ha banze ba taha cwalo kwa mafelelezo a mulaini wa batu, a bize linombolo ze tatama, mwa bona, kuli lusike lwa yema kaufela, bayeme fo fa nako yetelele halunze lu lapelela ba—ba kulapelela—bakuli. Ku lukile. Cwale luka—luka . . . Ni bata—lu bata kuli mu . . .

¹⁵² Ni bata ku ambola ku mina habanze ba beya sicaba sani kuli basike ba filika filika hamoho.

¹⁵³ Cwale, kutokwe ya ka taha konji pili nombolo ya—ya hao ha se i bizizwe. Lu bizelize baba lishumi ka ba ketalizoho, Na lumela ki yona, kamba mashumi amabeli, sesiñwi cwalo fani, Ni ka bulela kuisa fa mashumi amabeli, mi cwale halu libeleleni. Mi zeo likaba zeñata mwateni cwale, kaufela sesili mwani.

¹⁵⁴ Mi cwale ki makadi amakai foo? Munanule mazoho a mina. Mi ki babakai baba sina makadi? Munanule mazoho a mina.

¹⁵⁵ Cwale, muhupule, ha mu lukeli kuba ni kadi ya tapelo. Lubile kwanu ka masihu amabeli, mi busihu ni busihu Moya o Kenile u hasanezi mwahala sicaba ku folisa sicaba, hakuna taba kamba makadi a litapelo. Kana ku cwalo? Kadi ya tapelo i eza fela nto iliñwi ku mina, ami tuse ku ba mwa mukoloko. Yeo ki niti. Kono muna ni tumelo, mi mutualima Moya o Kenile kuzwa fa katala, ona fa, ni kuya mwahala sicaba sani kwani. Ki babakai baba ziba kuli yeo ki niti?

¹⁵⁶ Cwale, Na—Na lumela, ka kutiya, haiba nekuna ni keleke isili kwanda keleke ya Pentekota, kuli Ne—ne ni kaya ni kulumela kuli, Ne ni kaba ni yona, haiba Ne ni nahana kuli nekuna ni nto yende. Mi ha mu ni utwa ni bulela nto yeñwi ka likopano, ni lika ze cwalo, Ha ni lwanisi sicaba. Kono ki . . .

¹⁵⁷ Kucwani ha no ka bona mutu yo lata, ainzi mwa mukolo o sweli kucimbauka kuliba kwa sibuba, mu uziba kuli mukolo wani u ka mu minisa, mi u bulela kuli, “Kihande, Na mulata, kono una—una ni nzila ya hae”? Batili, Hani koni kueza cwalo. Zeo ha li yo ku na. Ne ni ka huwa, kumata ni ku mu swala, ku mu nyunga, ku mu nyunganyunga mwateni, kamba sika sesiñwi, kuli ni mu zwise mwateni, mwabona.

¹⁵⁸ Mi Ni ziba kuli wani hauna ku mu fitisa hande fa sibuba. Yeo ki niti. Sina ni kukuta ku Kreste, ka niti sina sika kaufela. Sina ni kukuta ku—ku Mulimu. Cwale Ni—Ni . . .

¹⁵⁹ Mañi ni mañi mwahali mo ubile mwa mikopano yaka, kana ki niti yeo? Amu nanule mazoho a mina haiba mubile mwa mikopano. Ku lukile. Hakuna nihaiba yomukana . . .

¹⁶⁰ Kana kuna ni babanca kaufela ba ba si ka ba kale ku ulimuñwi wa mikopano yaka haisali? Amu nanule mazoho. Kihande, ki sikamañi se mueza... Nali kuba... Kana ye kona nako yapili ha ubile ku ulimuñwi wa mikopano yaka? Amu nanule mazoho a mina hape. Kihande, Na—Na—Na mi bulelela, Na . . .

¹⁶¹ Mwendi kihande Ni cince nto ye. [Muzwale uli, “Tatulula hanyinyani ka bulumiwa bwa hao.”—Mu.] Kihande, Ni—Ni bulele fela kanti.

¹⁶² Mina, ku mina sicaba baba sa zo taha fela, Ni—Ni ka... Si ka ningela fela fa nako yelikani, mizuzu yelikani fela. Mutuhele ni tatulule, kakuli mu ka ya ni maikuto a fosahalile, mwabona.

¹⁶³ Na lumela mwa kezo kaufela ya Mulimu. Kono Ni lumela kuli Bibele ya lu sepisa, mwa mazazi a maungulo, kuli ku lukela kuba cwalo, litahe hape, Keleke ina ni kukena mwa mukwa o swana mo ne i belanga, wa na isiile ka ona Jesu nako ha ya. Mwabona, ki Munyaliwa, ina ni kukutela mwa sibaka sani. Cwale, lutile hala misebezi yemituna ya Mulimu, ka kutapiswa, kukeniswa, kolobezo ya Moya o Kenile, ku kutisezwa kwa limpo. Kono ka kulatelela buino bwa Abraham... .

¹⁶⁴ Cwale, Ha ni si ka ituta, mi kacwalo Ni lukela kuitusisa nto yeñwi sina Joani Mukolobezi. Na si ka ituta, niyena. Na ile mwa lihalaupa, mwendi ka myaha ye naini ya kupepwa, mi na si ka yo ituta. Kacwalo likutazo za hae ne li yendamezi ku ze bupilwe, “O mina lusika lwa linoha.” Mwabona, sani kona sika se si maswe ku za na boni, mi kiyona ye bubebe hahulu, mi a ba biza kuli “linoha.” Mi ali, “Mina lusika lwa linoha, ki mañi ya mi lemusize kusaba kwa buhali bo bu taha? Mu si ke mwa kala kubulela kuli, ‘Luna ni *yo*, mi lu ba siemba *yo*.’ Mulimu wakona ka ona macwe aa,” zani kona za na bonanga fa likamba la nuka, “ku zusa bana ku Abraham. Mi, hape, silepe,” kona sa na itusisanga mwa lihalaupa, “se si yendekilwe kwa mubisi wa kota. Mi kota kaufela ye sa beyi muselo omunde, ya lemiwa kwatensi.” Wani kona mufuta wa na cisanga, ni ku tumbula mulilo ka likota zani, mwa bona. Kono likota zende... . Yena—yena uba fela ni likutazo za hae ona cwalo.

¹⁶⁵ Kacwalo, ku se, Ni bata ku—ku si bulela ka mukwa wo. Lu kwa nako ya maungulo, nako ya kutulo.

¹⁶⁶ Cwale, mwa musipili wa Abraham, a katana Mulimu mwa mikwa ye shutana, ni zeñwi cwalo, ili zeo lukona ku nga ni ku li bonisa. Fela, lu Peu ya Abraham, haiba lu ku Kreste. Mi Isaka nali mwana—mwana hae luli; nali mwana hae, ka foso. Kono, ka moyo, Kreste nali Peu ya Abraham, Peu ya hae ya silena, tumelo ya hae.

¹⁶⁷ Cwale lu fumana kuli Peu ya hae ya silena ki, musipili o swana, yani ki, Munyaliwa wa Kreste ya zamaya mwa musipili o swana wa na zamaile Abraham. Mi sisupo sa mafelelezo sa na boni Abraham, mwana wa sepiso a si ka taha kale, neli fani Mulimu hana bonahalile mwa mubili wa butu, mi Mangelo amabeli ataha fafasi.

¹⁶⁸ Jesu naize, ku Muñoli Luka, kauhanyo ya 17 ni timana ya 30, kuli, “Sina mo ne kuinezi mwa mazazi a Nuwe.” Na bulezi ka nako ya Nuwe. Mi ali, “Sina mo ne kuinezi mwa mazazi a Sodoma,” mwabona, Kutaha kwa Hae, “kona mo ku kabela mwa mazazi foo Mwana mutu ha patululwa.” Cwale, Na si ka bulela kuli “Mwana Mulimu” ha patululwa. “Ki Mwana mutu!”

¹⁶⁹ Cwale, Jesu natile ka mabizo amalalu. Mwana mutu, yali mupolofita; Mwana Mulimu, ya na fitile mwa lusika lwa Keleke; ni Mwana Davida. Kono mwahala Mwana Mulimu ni Mwana Davida, kuya ka Linzwi la Hae Tota, ni kuya ka Malaki 4 ni Mañolo amañata, Uka kutela mwa Keleke ya Hae, mwa mubili wa nama, mwa sicaba, mwa... mwa batu, ka nzila ya kuba mupolofita. Mwabona?

¹⁷⁰ Mi mutualime sa na ezize Muuna yo ha Na tile ku to bona Abrahama. Taba yapili, Na bulelezi Abrahama ka libizo la hae kuli li cincizwe, kakuli Na si ka mu bisa kuli Abrame, Na mu bize kuli Abrahama. Mi ha Na ezize cwalo, kupalañi, lu fumana kuli—kuli Na ize, “U kai musala hao, Sarah?” S-a-r-a-h; isiñi S-a-r-r-a.

¹⁷¹ “Kiñi,” ki hali, “u inzi mwa tende kwa mulaho wa Hao.”

¹⁷² Ki hali cwale, musali nana ni myaha ye nainte mi Abrahama neli mwanda, mi ki Hali, “Cwale Ni ka ku potela kuya ka sepiso, ka nako ya bupilo.”

¹⁷³ Mi Sarah mwahali, a Mu utwa, inza teezea kwa limota la tende, mi a seha. Mi Lingeloi, Muuna yana inzi fani, ali, na lemuhile moyo wa hae kwa mulaho, kwa mulaho wa Hae, mi ali, “Ki kabakalañi Sarah ha sehile, ka kubulela lika ze?”

¹⁷⁴ Kihande, ba bisa Sarah, mi a li hana. Ki hali, “Kono u ezize cwalo.” Na saba.

¹⁷⁵ Cwale Jesu naize, bukaufi fela ni Kutaha kwa Mwana Mulimu, kamba Mwana wa... ili Kutaha kwa bubeli, lona lusika mo lupila ku lona...

¹⁷⁶ U taha sina Mwana mutu, ali mupolofita, kakuli seo si taleze Mañolo. Mushe naize, “Mulena Mulimu wa mina u ka zusa mupolofita ya swana ni na.” Kaufela lwa ziba kuli yani neli Jesu. Nji cwani? Kacwalo Nana ni kutaha kuya ka Mañolo, ali mupolofita. Na si ka ipiza Iliyena kuli ki Mwana Mulimu; Na ipiza Iliyena kuli Mwana mutu.

¹⁷⁷ Kono cwale Yena u cwalo, mwahala lusika lwa Keleke cwale, Ubile Mwana Mulimu. Mwa puso ya Mileniamu Ukaba Mwana Davida, ha ka ina fa lubona lwa Davida. Kono mwahala nako ye, lu fumana cwana ka Mañolo, Uka i patulula Iliyena hape sina Mwana mutu, ali mupolofita.

¹⁷⁸ Kakuli, Linzwi la Mulena litahanga kwa bapolofita fela, isiñi kwa baituti ba za bumulimu. Ki bapolofita. Mi Mulena ali hakuna sa Na ezize, mwa Linzwi la Hae le li sa cinci le lu bulezi ka lona, kufitela pili A bonisa bapolofita ba Hae. Mi nako ya maungulo, ona maswayo a supa ani ao Bibebe ye i swaile, likunutu ze sebene za Kreste kaufela, lina ni ku patululwa pili, mi likona fela kutiswa ku mupolofita. Lubile lu libelela zeo, fa myaha, mi lu lumela kuli Moya wa Hae uteni mwahala luna cwale, kacwalo lu fumana...

¹⁷⁹ Cwale mutualime fani Jesu ha taha, mutualime sa Na ezize kuli a bonahalise Mesia yani, yena Ya Tozizwe yani. Zazi leliñwi, kasamulaho Amano amuhela . . . Ndate na tilefafasi ku to pila ku Yena, mwa mufuta wa nkwalimba ye ne zwile kwa Lihalimu, ali, “Yo ki Mwana Ka ya latwa, ki ku Yena mo Ni tabelakuina.”

¹⁸⁰ Kona libaka ha Na bulezi kuli, “Na ni Ndate lu nto Iliñwi. Ndate u pila ku Na. Ha ki Na ya eza misebezi; ki Ndate ya pila ku Na.”

¹⁸¹ Joani na pakile, ka kubona Moya wa Mulimu wani, inge liiba, ha li shetumuka. Linzwi la zwa ku Yona, lali, “Yo ki Mwana Ka ya latwa Mo Ni katedwa kupila.” Mwabona, mi A to pila ku Yena.

¹⁸² Cwale mutualime bulumiwa bwa Hae ha ne bu kalile, Nana ni kueza sina Mwana mutu cwale. Cwale mutualime sa Na ezize. Kwa taha muuna wa libizo la Simoni Pitrosi. Libizo la hae neli Simoni ka nako yani, kasamulaho a bizwa Pitrosi. Andreasi na banga mwa mukopano wa Joani; mi cwale Jesu ha taha, mi Joani a Mu zibahalisa, a Mu bona. Mi Andreasi a kupa muhulwa na hae, Simoni, kuli atahe kwa mukopano ni yena.

¹⁸³ Mi na bulelezwi ki ndata bona, sina hane ku bulezwi kuli, “Ku ka taha nako, foo Mesia a sika taha kale, kuli kukaba bo mesia babañata ba mahata ba ba ka taha.” Kuna ni nzila yeo kamita. Ki hali, “Kono, bana, muhupule, Mesia wa niti, mu ka Mu ziba kakuli U kaba ka Mañolo. Ukaba mupolofita. Cwale, ha lu si ka ba ni mupolofita fa mianda anda ni mianda ya lilimo, kuzwa ku Malaki. Kono ku kaba batu ba bañata baba ipapata,” ili bao lu ziba kuli neku na ni; nekuna ni Jesu ya na tile ni kulwala sikuwata, ni zeñwi cwalo, “kono Mesia wa niti yo u ka ba mupolofita.” Mi Maheberu kaufela ba lutilwe kulumela se ba bulela bapolofita kuli kona niti.

¹⁸⁴ [Hakuna manzwi fa tepu—Mu.] Ona fani fela muyambi ya si ka ituta yani, yo lu bulelewana mane nasina tuto yeñata ya kuziba kuñola libizo la hae, bibile ibulezi kuli nali zepeli cwalo “sitimbi mi ya si ka ituta,” na lemuhile kuli yani ki Mwana Mulimu. Na lemuhile kuli yani ki yena Mesia, kakuli nekuna ni mupolofita. Neku na ni Yana mu bulelezi libizo la hae, ni ku mu bulelela libizo la ndatahe. Mi a ziba kuli yani na lukela kuba mupolofita, kakuli Mutu yani na sa mu zibi. Mi a fiwa linotolo za Mubuso.

¹⁸⁵ Mi lu fumana kuli nekuna ni babañwi bene ba yemi kwani bene ba teezea zani, mi alimuñwi wa libizo la Filipi, yana nani . . . yana na ni lituto za Bibebe ni mulikani, wa libizo la Natanaele, inza libelela Mesia. Kacwalo u mata kwa lilundu, mwendi ki musipili wa lizazi mutumbi, ni kukuta. Mi afumana Natanaele yo kwani mwatasasa—mwatasasa kota ya feiga, inza lapela. Mi ki hali, “Taha, u tobona Yo lufumani, Jesu wa Nazareta mwana Josefa.” Kacwalo Natanaele kakuba . . . kamba Filipi kamba . . .

¹⁸⁶ Natanaele, nitaluse, kakuba muuna yomunde, na ize,
“Cwale, kana kuna ni nto yende yekona kuzwa mwa Nazareta?”

Ki hali, “Kihande,” ki hali, “taha fela u to bona.”

¹⁸⁷ Cwale, yeo ki kelezo yende. Taha, u i ponele ili wena. Usike waitulela kwandu inge u nyaza fela. Taha, u i zibisize. “Mubale Mañolo, ku ona muhupula kuli muna ni Bupilo Bobusafeli.” Jesu abulela, “Ki Ona a paka za Ka.”

¹⁸⁸ Kacwalo mwa musipili wa kukuta, hakuna kukakanya, ne ba na ni ngambolo nyana. A ba bulelela, ali, “Mwa ziba muyambi wa mucembele yani ya na sa koni kuñola teko ya litapi zo no lekile maloba nyana? A mu bulelela. Mwa ziba kuli ndatahe naliteni mwa keleke mwani, wa libizo la Jonasi. Mwa hupula? Kacwalo, Na—Na—Na mu bulelezi yo nali yena.”

“Oh, Ni lukela kubona sani.”

¹⁸⁹ Kacwalo ha yo fita kwani, mi mwendi na li mwa mukoloko wa tapelo, ko ne kuinzi Jesu. Ha ni zibi. Na ile fa Pil'a Jesu. Jesu amu talima, mi ali, “Amubone mu Isilaele, ya sina bumaswe!”

¹⁹⁰ Cwale, nako yapili, mu li, “Kana Na zibile cwani kuli nali mu Isilaele? Kihande, kakuli na apezi cwalo?” Batili, batili.

¹⁹¹ Ba kwa Upa kaufela ba tinanga mikango yani. Ba apala zeswana. Mi ali, “Mu Isilaele.”

¹⁹² Mi ki Hali, “Ki yasina bumaswe!” Kambe na kaba kuluku kamba nto yeñwi, na ka swabiswa. Ki hali, “Ya sina bumaswe kuyena!”

¹⁹³ Mi kuli mufuta wani wa zwisa buhali ku Natanaele, kacwalo ki hali, “Rabbi, U ni zibezi kai? Kiñi, Ha—Ha—Ha ni utwisisi se. Ki lili fo Ni zibezi? Nali kuba ni Ku katane fateni. Ni tisizwe fela kwanu ki Filipi. Ki lili fo ni zibezi?”

¹⁹⁴ Ki hali, “Ha ne u sali mwatasa kota ya feiga, ha ne uli kwani inge ulapela, Ni ku boni.” Eehe. Mwabona?

¹⁹⁵ Ki hali, “Muluti, Wena u Mwana Mulimu. Wena u Mulena wa Isilaele.”

¹⁹⁶ Jesu naize, “Kakuli Ni ku bulelezi seo, kona ha u lumela? Konakuli u ka bona ze tuna kufita ze.”

¹⁹⁷ Cwale, nekuna ni bene ba yemi kwani. Cwale ha lu boneñi ni mife temuso nyana. Nekuna ni bene ba yemi fani, baluti ni baprisita, mi se bali, “Muuna yo u eza se ka Baalezebubi.”

¹⁹⁸ Mi Jesu afetuha ni kubulela kuli, “Ni ka mi swalela ka zeo,” kakuli swalelo ne isika fiwa kale, “kono zazi leliñwi Moya o Kenile ha u ka to eza ze swana,” Na ize, “ni ku bulela linzwi li liliñwi ku Li lwanisa, ha u na ku swalelwa mwa lifasi le kamba lifasi le litaha.”

Ku musali fa lisima, sa Masamaria.

¹⁹⁹ Cwale, ne ku na ni mishobo yemilalu ya batu fa lifasi. Lwa kona kuba ba bansu, baba fubelu, baba ñandatalukeke, kaufela seo luli sona, kono lu zwelela kwa mali alimañwi. Mi kuna ni masika amalalu, a zwelela ku Kama, Sema, ni sicaba sa Jafeta; mi yoo ki Mujuda, wa Macaba, ni Musamaria, licika la Mujuda ni wa Macaba.

²⁰⁰ Cwale, luna Bamacaba, Anglo-Saxon, neluli mahedeni, lu lapela milimu. Ne lu sa libeleli Mesia ufi kaufela.

²⁰¹ Kacwalo Jesu ha na i ponahalize Iliyena kuba Mwana mutu...Cwale muteeleze ka tokomelo, mi Ni ka kwala. Mi Jesu ha taha, Na tamehile kuyemela sa na bulezi mupolofita kuli Ukaba sona, kacwalo kwani fapila Isilaele Na iponahalize Iliyena, fapila Pitrosi ni Natanaele ni bani kwani, kakuba Mwana mutu.

²⁰² Cwale U tokwa kuya kwa Samaria. Mi Uya kwa Samaria, mi kwani A yo fumana musali ya na inzi fa siliba. Lwa ziba likande, mi sina yena, ne ba ambola hamoho. A taha ku to ka mezi. Ki hali, “Aku Ni fe kwa mezi.”

²⁰³ Mi yena ali, “Cwale, kuna ni ketululo kwanu, ha lu koni kuba ni se. Mi Na ni musali wa Musamaria, mi Wena u Mujuda. Haluna...”

²⁰⁴ Ki hali, “Kono kambe wa ziba Yo ambola ni yena, no ka Ni kupa mezi.”

²⁰⁵ Musali ali, “Kihande, lisima li tungile, ki sikamañi So ka kisa ka sona?”

²⁰⁶ Mi ngambolo ya zwelapili kufitela A swala moyo wa hae. Mi ha Na lemuhile moyo wa ahe, A fumana butata bwa hae. Ki babakai baba ziba cwalo? [Kopano ili, “Amen.”—Mu.] Cwale ki babakai ba mina baenyi ba ba ziba kuli yeo niti? [“Amen.”] Yeo ki niti, yeo neli niti.

Mi ki sikamañi sa Na bulezi? “Zamaya u yo biza muuna hao mi mutahe kwanu.”

Musali ali, “Ha ni na muuna.”

²⁰⁷ Mi ki Hali, “U bulezi hande. Kakuli ubile ni baana ba ba ketalizoho, mi yena yo pila ni yena cwale ha ki muuna hao.” Na fetuhile.

²⁰⁸ Cwale, na sa swani sina baprisita bani, ali, “Una ni dimona. Ki mulauli kamba nto yeñwi.”

²⁰⁹ Musali afetuha, mi ki hali, “Muñaka, Ni lemuha kuli U mupolofita. Cwale, ha lu si kaba fateni ni alimuñwi ka myaha ye mianda yemine. Keleke ha i si ka twaela kale ku se. Kono lu lemuha kuli, Ni lemuha kuli U mupolofita. Cwale, Ni ziba kuli lu libelezi Mesia. Mi cwale Mesia ha ka taha, yeo kona nto Ya ka eza.”

²¹⁰ Cwale Bibele iize, "Yena wa swana maabani, kacenu, ni kuyakuile." Haiba sani neli sisupo se si tozizwe sa Mesia kwa mulaho kwani, kwa Samaria ni kwa Majuda... Cwale, ne li si ka ezahala kale fapila Bamacaba. Hakuna nihaiba mwa Bibele fo Jesu akile a li eza fapila Bamacaba. Ne ba na ni myaha ye likiti zene ya kubata Mesia; lubile ni myaha ye likiti zepeli, ni lituto za bona, hape, kulibelela Mesia.

²¹¹ Cwale, haiba yani neli zibahazo ya Hae lizazi la bona li si ka fela kale, lina ni kuba zibahazo ya luna, kakuli Na sepisize Mwana mutu kuli uka i patulula Iliyena hape mwa lizazi leo lifasi likaba sina Sodoma hape. Mi mutu kaufela u ziba kuli luteni kwani. Mwabona?

²¹² Cwale, Ni lumela kuli Jesu Kreste u buluka Linzwi kaufela. Liñolo kaufela li susumelizwe. Hani lumeli kuli luna ni tukelo iliñwi, mi lu ka atulwa ka zona, haiba lu ekeza linzwi ku Lona kamba kuzusa Linzwi leliñwi ku Lona. Sinulo 22 ibulela cwalo. Ni lumela kuli Yena wa swana maabani, kacenu, ni kuyakuile.

²¹³ Na kuteka ba Lutheran ka mayemo abona mwa lizazi la bona, ba Methodist ka kukeniswa mwa lizazi la bona, ni Mapentekota ka mayemo abona mwa lizazi labona, kono lupila mwa lizazi lisili. Lu pila ha se kubile lutaka, sibunga, sikapi, mane inge Buloto, kono Buloto bu mwahala sikapi. Sikapi si lwezi fela Buloto, si buluka lizazi le li cisa kwa ku Bu cisa. Mi cwale kopano i sweli kuhohiwa kuzwa ku Yona, kuli I kone kuba Fapila Mwana, kuli ibuzwe. Kacwalo luna—luna lumwa... Hakusana kuba ni kopano ye ka zwa kuyona. A kona mafelelezo a zona. Lubile ni zona, kamita ki lilimo zetalu, fo liñusa ha li kalisa, ba li ongaonga.

²¹⁴ Le libile li ezahala bukaufi ni myaha ye mashumi amabeli, mi kusina kopano. Ha ku konahali. Lu mwa nako ya Buloto, nako ya kutulo. Ni utwa mukutuli yomutuna ha taha. Lu ya kwa Hae zazi leliñwi. "Ki ya swana maabani, ni kuyakuile."

²¹⁵ Cwale, ha Ki na Yena, kono Ni mutanga Hae. Ha ni lumeli kuli ubeya mazoho fa sicaba ni kubafa limpo. "Limpo ni lipizo halitahi ka kubaka." Ba ketilwe kale, ki Mulimu, ku kopana ni lusika ni nako ya lusika lwateni. Muituti wa Bibele kaufela wa ziba kuli yeo ki niti. Mushe na pepilwe fela ka nako yeswanelo. Jeremia, mwa nako yeswanelo, kaufela babañwi ba bona. Joani Mukolobezi, mwa nako yeswanelo. Jesu nali mwa nako yeswanelo. Mi luinzi mwa nako yeswanelo. Se kona se si lukela ku ezahala.

²¹⁶ Cwale, Ni bulela kuli Wa pila kacenu, ni Moya wa Hae. Kasamulaho wa masika a likeleke, lu mwa lusika lwa keleke ya Laodesia, pizo ya mafelelezo, mi ze maswe za mwahala bona kaufela, kakuli Na lelekezwi kwande a keleke. Muhupule, Mwana mutu, mi Na lelekezwi kwande a keleke; isiñi kopano yezwa mwa kopano, kono ki Mutu ya zwela kwande a kopano.

Mwabona? Hakuna ni yekana ya masika a likeleke ye ne bile ni zeo, konji ya Laodesia. Haiba u wa moya u ka utwisisa.

²¹⁷ Ndata luna yakwa Lihalimu, cwale Ni pakile kaniti za Hao. Cwale haiba ye ki niti, yeo Ni ziba kuli ki yona, Mulena, Na lumela ki niti, U paka kuli Ni bulezzi Niti. Ka Libizo la Jesu Kreste. Amen.

²¹⁸ Ni ka kupa nto yeñwi, fa nako nyana fela. Ne ni sike kuba ni temuho mwa mukoloko, kakuli Ne ni hupula kuli mina kaufela mubile fela mwa bulumiwa bwaka. Kono haili sicaba se sesili mo, mubone kuli babañwi ba mina sicaba kwande kafo mu yo lapela, ni kutuhela fela mutu yomuñwi mwa mukoloko, kamba nto yeñwi. Mi cwale haiba Jesu Kreste akona kunga mutu yo. Halina ku beleka kusina wena. Ki wena yaeza lika.

²¹⁹ Cwale, muiteeleze, musali na sweli sapalo sa Hae, zazi leliñwi, mi A sikuluha, ali, “Ki mañi ya Ni sweli?”

²²⁰ Kaufela bona bali, “Kiñi, U bonahala . . .” Kamba, Pitrosi ali, “Kiñi, hanili nyangela kaufela basweli ba Ku swala.”

²²¹ Ki hali, “Kono Ni lemuha kuli Ni fokozi, kamba mata a zwile ku Na.” Mata ki “kutiya.” Mi ali, “Ni lemuha kuli Ni—Ni fokozi.”

²²² Mi kacwalo A talima kwa ni kwa, ku musali, kufitela A mu fumana, ni ku mu bulelala ka za butata bwa hae bwa mali. Ni kuli musali . . . Na ize, “Tumelo ya hao iku pilisize.” Ku lukile.

²²³ Cwale, Yena wa swana maabani, kacenu, ni kuyakuile. Mi Testamente ye Nca, Buka ya Maheberu, ibulezi kuli, “Ona fa cwale Ki yena Muprisita Yomutuna ya mi kupela kwateni, ya kona ku swaliwa ka maikuto a matuku a mina.”

Cwale, fa, kana yani—kana yani ki alimuñwi wa bakuli mo? Amutahe.

²²⁴ Cwale, kwa sicaba. Ha ni ezi se ka ku iponisa, balikani. Cwale mutuhele kunahana cwalo. Muhupule, Na utwa minahano ya mina. Ki babakai baba ziba kuli yeo ki niti, mi ba i bona?

²²⁵ Ki yo fa musali ye Ni—Ni si ka bona kale fateni. Hakuna se ni ziba ka musali yoo. Lu pepilwe limaili maili mwahali, ni lilimo mwahali, mi ki luna ba luyemi mo busihu boo. Lu baenyi ku mañi ni mañi. Ha ni ku zibi. Cwale, Hanina mulelo. Fa—fa kuna—fa ki yo Joani Muñoli 4 hape, ki—ki muuna baba katani ni musali. Cwale, Ha ki na Jesu mi ha ki yena musali yani. Kono fa ki taba yeswana fela. Mi ki Hali, “Misebezi ye Ni eza muka i eza ni mina.” Cwale, Ha ni zibi. Si lwala tumelo ya musali yo kueza cwalo. Hakuna se ni ziba ka yena. Kono cwale haiba Ni bulezzi kuli yeo ki niti, kona kuli Mulimu una ni kueza . . . kubulela kuli se si lukile. Cwale, ni sa ku zibi, haiba Mulimu wa Lihalimu . . .

²²⁶ Mi Ni bulezzi Niti. Kana mwa lumela kuli se Ni bulezzi ka sona ki Niti? Wa amuhela yeo kuba niti? [Kezeli uli, “Na lumela cwalo.”—Mu.] Wa lumela cwalo? Hani koni kuyema fa fapila Bibebe ye Kenile ye ni kulika ku lyanganisa mutu, muuna wa

lilimo za ka, ni kuziba kuli Ni lukela ku yo kopana ni Mulimu kwani kwa Museto wa Katulo. Lu lukela kuyema kwani, zazi leliñwi. Lwa ziba cwalo.

²²⁷ Cwale haiba Mulimu wakona kupatulula, ku na, sesiñwi mwa bupilo bwa hao, kuli uziba kuli hakuna se Ni ziba ka zona, kakuli ha Ni ku zibi. Haiba sika kaufela, sina ni kuba sesiñwi mwa bupilo bwa hao. Hakuna se ne ni ka ziba ka zona. Ne si ka zwelela kwa Mata a buipiteli. Mi kipeto ku ka itinga ku wena, so nahana kuli kona Mata mwa inezi.

²²⁸ Cwale ku mina baenyi. Cwale Na nanula lizoho laka. Cwale, shangwe mu si ke mwa zamaya zamaya cwale, kakuli, mwabona, mañi ni mañi wa mina mu moyo. Ha Ni sikuluha, u ikutwa fela inge—inge kuhohoa ko ku zwelela kai ni kai. Mwabona, mu—mu libupiwa za batu mi muna ni moyo. Mi wena u moyo. Haiba ha u cwalo, u shwile. Kacwalo mu kuteke fela, ka nako yelikani.

²²⁹ Ni mina baana mo, mulapele. Ne ni sa kulubeli taba ye, ha ni si ka tela taba ye busihu bwa kacenu, ni hanyinyani. Ni tezi fela ku to lapelela bakuli. Kono bao ki ba banca.

²³⁰ Cwale, kana mwa lumela cwalo? Haiba Mulena a kona ku ni bulelela butata bwa hao, kamba so tezi kwanu, sika so ezize kamba so lukela kueza, kamba—kamba nto isili fela, ki kuli uka lumela? Ku lukile, Ni lika kuswala moyo wa hao, wa bona. Sani kona se Ni lika kueza. Sina mwa Na ezelize ku musali fa lisima, Na ambozi ni yena fa nako nyana, mwabona, Nasweli ku kupa mezi. Mi sani kona se Ni lika kueza, ki kunga muhupulo wa mina, ha ni bali mihupulo ya mina; kono kulika kueza sina mwa Na ezelize, ni lemuha milelo ya mina.

²³¹ U tezi kwanu bakeñisa butuku bwa mwa mba. Una ni butata bwa mwa mba. Yeo ki niti. Nanula lizoho la hao haiba yeo ki niti. Kana wa lumela cwale? Ha ki seo fela, kono u na ni tala ya nto isili fela. U bata kolobezo ya Moya o Kenile. Nyanganyisa lizoho la hao haiba yeo ki niti. Mwabona? Ni boni Liseli lani ha li shetumuka ku yena, mi ni kukuta mwa mulaho, mwabona. Zamaya u amuhele Moya o Kenile, ka Libizo la Jesu Kreste, zwelapili cwalo.

²³² Kana mwa lumela cwale, babanca? [Kopano ili, "Amen."—Mu.] Cwale mu li . . .

²³³ Cwale fa, mwabona, tozo yani i sa kalisa fela, kipeto ki zeo Za ezahala. Mwabona, ona fani fela musali hana yemi, ki yani fani, u teni ona fa . . . Wa lemuha kuli kuna ni Sesiñwi se si mu potolohile.

²³⁴ Ki ba bakai ba bakile ba bona fateni siswaniso sa Siita sa Mulilo sani, Liseli lani kwani? Kwa Washington, DC. Mwabona? Cwale Ni lakaza kuli . . . Ki sibaka sesiñwi, cwalo. Ni sweli ku Si talima. Ki Sani fani si lepelela fa bukaufi ni musali. Ni sweli ku Si talima.

²³⁵ Cwale, Na ni muenyi luli ku musali yo. Ha ni mu zibi. Mi Ni kakanya hahulu haiba wa ni ziba, ka kuba fela kwande mwa mukopano. Ku felile. Kono haiba Mulimu wakona ku ni bulelela nto yeñwi ka wena, kamba nto yeñwi ye cwalo fa nako nyana yefitile, kikuli uka ni lumela kuba mupolofita wa Hae, mutanga Hae? No ka lumela cwalo ka pilu ya hao kaufela? Kihande, mi Ha li lumeleze cwalo. Wena u, u libelezi kuyo pazuliwa, mi kupazuliwa ko ki kwa lizoho la hao. Hakuna libaka ku zona, kono ki musinga o nyanganyisa lizoho la hao. Zeo li tisizwe ka kozi ya fa mukwakwa, mi u lukela ku yo pazuliwa. Ha u lumela, hauna ku yo pazuliwa, haiba u ka lumela fela ka pilu ya hao kaufela! Amen. Kana wa ni lumela kuba mupolofita wa Hae?

²³⁶ Fela—fela mube ni tumelo. Fela musike mwa kakanya. Mulumele fela. Cwale, fa, mutuhele musali alimuñwi yo hape, kakuli musali yo u mwa buino bo bu sabisa. Mwa bona muluti omunsu wani? Ki ba bakai ba bakile ba bona fateni siswaniso sene si swanisizwe sa muluti o munsu wa lifu? Lisweli ku lepelela fahalimwa musali ona fa cwale. Haiba Mulimu ha mutusi, hakoni kupila. Una ni kansa. Mi sitombo si mwa booko. Uh-huh. Uh-huh. Uh-huh.

²³⁷ Mulimu Yomunde, haiba Uteni bukaufi hahulu cwale, wena ya ziba lika ze kaufela, Na lapela, Mulimu Yomunde, kuli U folise kezela luna. Ha pile, Ndate, kwa kanya ya Hao. Ni kupa ka Libizo la Jesu Kreste. Amen.

²³⁸ U ikutwa cwani? U mutu yomunde hahulu. Kambe bo ma ne ba sa pila, ne ba kaba fela mwendi mwa lilimo za mina cwana, Na sepa. Ba mwa Kanya, busihu boo. Ne ba ni lapelela kamita ha ne Ni yanga kwa mukopano. Na bulelela Mulena . . . [Kezeli uli, “Ni na ni myaha ye eite-faifi.”—Mu.] Ima? [“Ni na ni eite-faifi.”] Myaha ye eite-faifi ya kupepwa. Ifuyolwe pilu ya hao, kezeli.

²³⁹ Cwale, Na ni muenyi luli ku wena, Na sepa. Lwa shutana mwa lilimo za luna. Mi ha Ni ku zibi. Nali kuba ni ku bone fateni. Luna lu batu bababeli fela baba kopani mwa lifasi mo, kono u Mukreste. U mulumeli. Kakuli, libaka le Ni zibela cwalo, ki maikuto a moya wa hao. U cwalo, u ni a muhezi, mwabona. Mi Ni lumela kuli ki Moya o Kenile, kakuli ufa misebezi ni likezo za Moya o Kenile. Mwabona? Mi Ni ziba kuli Ki Yena. Ni ziba kuli nto ye ye lu bulela ki ya niti. Cwale, Ni ziba kuli ki niti.

²⁴⁰ Cwale, Ha ni zibi se ne si ka fosahaha. Kono haiba Mulena Jesu u ka patulula kuna se si ka fosahaha ku wena, kikuli . . . no ka ziba haiba ki niti kamba nee, kamba ku ni bulelela sika so ezize, kamba so no sa lukeli kueza. No ka lumela kuli ki yena Mulena Jesu yaswana yani, Mulimu yaswana yana bulelezi Filipi kwa na inzi, ni ku mu bulelela Simoni libizo la hae? Kana u Mu lumela kuba Ya swana?

²⁴¹ Butata bwa hao ki butata bwa mala. [Kezeli uli, “Kiniti.”—Mu.] Yeo ki niti. Nji cwani? [“Eeni, sha.”] Wa ni

lumela cwale kuba mupolofita wa Hae? Libizo la hao u musala Bo. Bayer, musala Bo. Bayer; inge Bayer aspirin. Yeo ki niti. U folisizwe. Zwelapili cwalo, Jesu Kreste a ku eze hande. Mulimu aku fuyole.

²⁴² Wa lumela ka lika za hao kaufela . . . Cwale haiba una ni fela tumelo, u sike wa kakanya!

²⁴³ Cwale, we na ha u si ka itahela ka za hao. Utile kwetu bakeñisa mutu usili. Ki muuna, mi haayo mo, ki muzwale. Muzwale yani u mwa sibaka sa lipulumuki. Unge kataulo kao mwa lizoho la hao, Moya ha u ku sweli cwalo, u mu lumele kona. U yo mubeya kona, kusina ku kakanya, u ka zwa mwa subaka sa lipulumuki sani ni kuba hande. Kikuli wa lumela cwalo? Mulimu aku fuyole.

²⁴⁴ U bulela kuli, “U bulezi kuli, ‘Lingeloi lani, mwa lizazi la mafelelezo kwani, Na fulalezi mukokoto wa Hae,’ ko talimezi.”

²⁴⁵ Hanina kutalima musali yo. Ni sikulula mukokoto waka. Cwale, kalibe, yena ya li mukuli, wa ni utwa kana, uli “eni.” [Kezeli uli, “Eni.”—Mu.] Haiba Mulena Jesu uka patulula kuna butata bwa hao, ha Ni talima neku le, u ka ziba haiba ki niti kamba nee. Kana ku cwalo? Kana u lumela kuli ki kutaleleza sa na bulezi Jesu, “Li ka ezahala mwa mazazi a amungulo, sina mo ne kuinezi mwa mazazi a Sodoma”? Kikuli u ka li lumela? Una ni butata bwa sisali, butata bwa sisali. U lumele ka pilu ya hao kaufela cwale, ika ku siya mi wa kona kuya kwa ndu mi ube hande. Mulimu aku fuyole.

“Haiba u kona kulumela!”

²⁴⁶ Kana u lumela kuli Mulimu uka folisa butata bwa pilu boo? Kihande, zwelapili fela kuzamaya, uli, “Ni Itumezi, Mulena!” Lumela!

²⁴⁷ Ha u zuha kakusasana, mane wa palelwa kuzamaya. Kuopa mwa lingongo ki nto yemaswe, kono Jesu Kreste ki yena Mufolisi wa kuopa mwa lingongo. Kana wa lumela cwalo? Ha u hata fa mahatelo, kwa matuko, ha u shetumuka. Na ku bona inge u eza cwalo. Ha una kueza cwalo ni kamuta, haiba uka lumela. Kana u lumela kuli Ni lumilwe ka mulelo wo? [Kezeli uli, “Na lumela.”—Mu.] Mi, ka Libizo la Jesu Kreste, ha li mu siye. Amen.

²⁴⁸ Una ni butata bwa mwa mba. Kana u lumela kuli Mulimu uka ku lumeleza kuya kwa ndu, u yo icela mulalelo wa hao, u ikutwa hande ka zona? Ikele mwa musipili wa hao, u yo ca mulalelo wa hao, u lumele mi uka ikutwa hande.

²⁴⁹ Una ni bufokoli bo bu ku tahela, yeo ki niti, kakuli pilu ya hao se i kulile. Yeo ki niti. Hausana zona zeo cwale. Zamaya, u lumele.

²⁵⁰ Ku cwani kambe Ne ni si ka bulela linzwi ni lelikana ku wena, ni ku ku beya fela mazoho, kana uka ni lumela, ni wena, kuli no ka ba hande? Taha kwanu.

²⁵¹ Ndate Yomunde yakwa Lihalimu, Ni lapela kuli U folise musali yo ni ku mu eza hande, ka Libizo la Jesu Kreste. Amen.

²⁵² Ki batu babakai mo baba lumela, buñata bwa mina baenyi, kaufela mina sicaba?

²⁵³ Munahane fela, mi mane ha Ni boni sicaba ha si taha cwale. Muhupule fela, pono iliñwi ne itisize Mulena Jesu ku fokola. Ki babakai baba ziba cwalo? Musali alimuñwi na Mu sweli. Daniele na boni pono iliñwi a katazeha mwa minahano, toho ya hae, ka mazazi nyana. Ki babakai baba ziba cwalo? Mwabona? Ku lukile.

²⁵⁴ Cwale ki babakai ba mina sicaba baba lumela cwalo, kuli wo ki Moya o Kenile? Kana mwa lumela ka lika za mina kaufela.... Ha ki na, cwale. Ki Moya o Kenile! Cwale ki ba baana ba baliteñi mo baba lumela cwalo, ni bona.

²⁵⁵ Cwale babañwi, cwale ba bañwi ba mina sicaba ba ba na ni makadi a litapelo ao, Ni bata kuli mutu kaufela ya kaba mwa mukoloko wa tapelo wo, a yeme cwale, fa nako nyana fela.

²⁵⁶ Mutualime, Ni bata ku mi buza puzo ye butokwa. Kana mu ipulezi libi za mina kaufela ze liteni? Mwa lumela? Kana uipulezi, mi u—u lumela kuli uka foliswa? U ipulezi libi za hao kaufela ni ku lukisa ze maswe kaufela? Munanule mazoho a mina, haiba mu ezize cwalo, fapila Mulimu, mwa lumela cwalo.

²⁵⁷ Mi cwale ni mazoho a mina mwahalimu, hape, kana mwa lumela kuli si lwala Moya o Kenile, mi wo ki Moya o Kenile o sweli ku i ponahaza Ili ona mwahala mina? Mwa lumela cwalo ka lipilu za mina kaufela? [Kopano ili, “Amen.” —Mu.] Mwa lumela? Kona kuli mañi ni mañi wa mina wakona kufoliswa.

²⁵⁸ Cwale kana muna ni tumelo ni sepo mwa bakutazi ba ba inzi mo? Kana mwa ba lumela, ni mina? Ku cwani he ha lu mi lapeleleni, mañi ni mañi, mi kipeto mutahe mu to beiwa mazoho.

²⁵⁹ Se si ni fokolisa hahulu. Sani si zwelapili fela ona cwalo, sa—sa ni swala fela.

²⁶⁰ Mi Ni—Ni ya kwa South Africa kasamulaho wa se. Kakuli, oh, mawi, mwa ziba mo kuinezi kulo kwani ko mu sa koni nihaiba kuambola kwa sicaba. Mi ku kaba...Lu libelela mbwesha mwendi likiti ze mianda yemilalu, mwa mukopano ulimuñwi.

²⁶¹ Kacwalo mu lumele fela! Mu teni mo mwa America, mu Li boni mwahali ni kwande.

²⁶² Mulimu Yomunde, sicaba se si tokwile. Mi hakuna se Ni ziba ka So kona kueza, Ndate, ka ku ba bonisa ka Linzwi la Hao, kuli ki Wena Mulimu ya sa cinci. Ni lumela kuli luboni lika zetuna hahulu, Mulena, mi lu cezi fa tafule ya Hao, ni lico zetabiza zecwalo, Lico zende za Bupilo Bobusafeli, kufitela lu ba...ni kuba baba i twaelize Zona. Ki—ki ze ba za sitwaelelo. Ha lu cwalo, ha lu lli atumeli ka swanelo, Mulena, ha lu libona,

mane Ni nahana kuli neba na ya yemi fa, Ni swanelu kuba fa mañwele inge ni kubami, ka kuziba kuli ona fa Moya ono Mu zusize kwa bafu wani uyemi ona fa. Moya o noli ku Ŷena ha Na pila mwa lifasi mo, uteni ona mo cwale. Mi luna, baezalibi baba sa swaneli, ka sishemo sa Hae ni sishemo, Na lekile bupilo bwa luna. Mi ki luna ba fa, kacenu, ku zwiseza pili musebezi wa Hae, sina ha Na bulezzi kuli lu ka zwelapili mwa musebezi wa Hae. “Misebezi ye Ni eza mu ka ieza ni mina.” Ku sepisa lika ze ni ku li paka, mwa lifasi le! Mulena, Ni itumela hahulu ku Wena, kuli Ni kona kuba ya baliwa wa siemba sa sicaba sa Hao, mwa lizazi la mafelelezo le.

²⁶³ Mulimu Yomunde, sicaba se si yemi. Ba kula, Ndate. Hanina mukwa wa ku ba folisa ka ona. Mi ni Wena u cwalo ni cwale, U ba folisize kale. No holofalezi bumaswe bwa luna, ka miupa ya Hao lu folisizwe. Kacwalo, Ndate, Ni lapelea kuli mañi ni mañi wa bona ha taha kwanu, ha lu ka ba lapelela, kuli ba tahe inge mo ne ba ka zamaela mwataswa sifapano. Kakuli ba ziba, kusina nihaiba mulutu wa ku kakanya, Moya o Kenile o pakilwe uteni fa katala fa. Kreste wa Mulimu uteni mwa mukopano. Swalela sibi kaufela. Zwisa ku sa lumela kaufela. Mi cwale mañi ni mañi wa bona afoliswe habanze ba fita mwa mukoloko wo. Ka Libizo la Jesu Kreste, Na kupu. Amen.

²⁶⁴ [Muzwale uli, “Muzwale Branham, haiba lukona kuba ni mutu kaufela kuli aine, ni kunga sibaka silisiñwi ka nako, ka nzila yeo konakuli habana kutitihana.”—Mu.] Eehe. Ku lukile.

²⁶⁵ Cwale Ni bata kukupa nto yeñwi. Kikuli mina, mizwale baka, mu ka yema hamoho nina?

²⁶⁶ Mwa bona, ki ye nto iliñwi ka zona. Babuleli babañata ba kena mwa munzi, mi basweli ku lapelela bakuli kaufela, ni babañwi ba bona kaufela. Mi cwale kopano, ha se iile, si—si—si sicaba si yahilwe fela kupotoloha mubuleli, mwabona. Zeo ha li cwalo, sicaba. Baana baa, Na kakanya mutu kaufela mwa lusika loo... Na ziba cwalo, kuna ni malikanyiso amañata hahulu, kono ha Nina kubulela sene Ni ka bulela. Kono baana ba ha ba koni kueza cwalo, yeo ki niti, mi Na kakanya luli.

²⁶⁷ Kono ba supilwe fela ki Mulimu, kuli ba beye mazoho fa bakuli, sina Na kamba mutu ufi kaufela. Mulimu wakona ku alaba litapelo za bona, sina Mwa konela ku alabelu tapelo kaufela ye liteni. Jesu u lumile, “Lisupo ze,” na si ka bulela kuli li ka latelela William Branham, Oral Roberts, ni babañwi cwalo, “li ka latelela ba ba lumela.” Mi baana ba batezi Moya wa Mulimu. Ki sicaba se si kolobelizwe, ka Moya o Kenile o swana. Moya wani noliteni fa unzo eza musebezi wani fa nako nyana yefelile, Usali teni mo. U inzi ku yomuñwi ni yomuñwi wa baana ba, mwabona, mi kaufela bona batezi ka Ona. Kacwalo Ni ka ba kupa kuli baeze mikoloko yemibeli kulo fa, kwa matuko a

mundandwe wo fa, haiba ba kona, kuli bakone kubeya mazoho a bona fa bakuli, ni bona, habanze ba fita cwalo.

²⁶⁸ Mi ba bata babana ni makadi a litapelo kuli bayeme, makadi a litapelo fela, kuli bayeme mwahala lipula. Mi mina baba siyezi kaufela mulapele, ka mizuzu fela yelikani cwale. Amuyeme, kwa maneku kaufela, muyemele fela kwa nzohoto yamina ya kalulo ye. Muyeme hande, kwa neku leliñwi, mi kipeto ba ka mi biza fela. Ha mu bona mukoloko wo ufela, mukoloko *wo* cwale utatame kuona. Mukoloko *wo* ha se u felile, mubone kuli *wo* u tahe mwateni.

²⁶⁹ Mi ha mu taha mwateni cwale, muhupule, mu ka izamaela fela haiba ha mu lumeli. Ki babakai ba mina baba ziba, mu ikutwa fela mwa lipilu za mina, kuli mu lapezi katata fa taba ye, mi mu ka foliswa mu sa fita fela mwa mukoloko *wo*? Nanula lizoho la hao, uli, “Na li amuhela, Kreste, ona fa cwale, bakeñisa fela kuli U lumile lika ze.”

²⁷⁰ Cwale Ni lapelela mañi ni mañi wa mina. Lu ka lapela. Ni ka kupa Kezeli Rose kamba ki mañi kaufela yali fa siñwañwa foo, Kezeli Rose, shangwe aku lize yakuli, *Naka Yomutuna Cwale Ufa Kaifi*, lu lizeze yona. Mu tuhele kuli sicaba, batu babañwi kaufela, mu be mwa litapelo. Mi habanze ba fita mwa mukoloko wa tapelo *wo*, Ni lumela kuli mañi ni mañi uka foliswa. Mulimu ami fuyole. Mina baba siyezi cwale muinamise litoho za mina fafasi, mi mulapelele babañwi.

²⁷¹ Mube baba sepahala luli. Mwabona, cwalo kona mukutazi yomunyinyani wa Baptist mwa na amuhelezi Moya o Kenile, busihu bobuñwi. Na sweli ku nahana ka zona, ali kuina fela fani, ka kusepahala luli, mi Wa wela fahalimwa sikuwata sa bona kaufela. U lukela kuba ya sepahala ni Mulimu.

²⁷² Cwale U pakile kuli Utensi mo ni mina. Utensi mo. Cwale mutu ha mi bulelala kuli se ki sikuwata fela sa ku tabisa, mwa ziba hande cwale, nji cwani, mina baenyi? U i patuluzi ili Yena, ki Yena. Mi hakuna mutu yana kona kueza cwalo. Se ha si si ka ezahala kale kuzwa mwa mazazi a baapositola. Kona i sa zo kutela fela kwa keleke cwale, sina mo ne ku sepiselizwe. Mulena ami fuyole cwale.

²⁷³ Cwale, mina sicaba, hamunze mutaha mwa mukoloko *wo*, mutahe, mulapele. Mañi ni mañi cwale, “Ki—ki *Naka yomutuna cwale ufa kaifi*, ki Jesu ya sishemo.” Cwale ha mu taha, mutahe ni litoho za mina fafasi, ka likute. Mu fitelele. Baana ba ha ba ka beya mazoho ku mina, mu ka foliswa. [Hakuna manzwi fa tepu—Mu.]

. . . -pina yende ha i opelwa . . .

. . . ? . . . Zeo li lukile. Kamuso busihu . . . ? . . .

²⁷⁴ [Hakuna manzwi fa tepu—Mu.] . . . ? . . . nto yateni. Kono, ki nto yebunolo fela ya ku utwela sa bulezi Mulimu. Ni li boni ha

liezahala linako zeñata hahulu. Mwabona, Mañolo mane a si ka lu laela kuli lu lapelele sicaba, Ne ku bulezwi fela kuli, “Mubeye mazoho fa bakuli, ba ka foliswa.”

²⁷⁵ Cwanoñu nyana fa, oh, ki . . . Hani buleli nako yefitile. Taba neili mwa munahano waka cwale. Se ibile lilimo zetalu kamba zene kwa mulaho, kamba kufitelela. Neluli ona mwa California mo. Basali bababeli ne ba tile kwani, alimuñwi wa bona nana ni—ni—ni kasolondo kwa sifateho, mi yomuñwi nana ni butata bwa mwa mba. Mi ba lumela ona cwalo. Na ba beya mazoho, mi nali, “Cwale, Ni eza se ka Libizo la Mulena Jesu.”

²⁷⁶ Neli kweli fela kasamulaho. Kalibe yani na sweli kulika kuca, ka butata bwa mwa mba bwani, na palezwi fela kueza cwalo. Kakusasana omuñwi, “maikuto amañwi a mande a mu tahela” fahalimu, ki hali, mi nanuha ku yo ca. Mi a matela ku yo bulelula muyaha tuko wa hae, mi muyaha tuko wa hae na tutula ma shiti, sina *cwalo*, kulika kufumana sikoto sene si zwile fa sifateho sa hae busihu bwani.

²⁷⁷ Mwabona, mulumele fela, balikani. Haiba Ueza cwalo ku alimuñwi, Uka li eza ona cwalo ni ku babañwi. Mi ki nto yebunolo fela ya kubeya mazoho. Mi zeo kona za Na bulezi kuli mueze. Ha lu zibi mo li belekela. Ha ni zibi mo li belekela. Ki sepiro fela ya Hae. Na bulezi kuli li ka ezahala. Mi Ni fumaní likiti ze mashumi, mwahala lifasi, ba i foletanga fela. Mulimu na sepisize kueza cwalo, mi ki sepiro ya Hae. Mwabona, lwa lumela fela cwalo.

²⁷⁸ Cwale, kaufela luna lwa taha kwanu. Mi mina baba palezwi kunanuha, mutahe fela bukaufi, mi lu taha ku to mi lapelela. Cwale Ni bata kuli mañi ni mañi wa mina baana muzwelepili mo, kubeya mazoho a mina mwahali mo, haiba mwa kona, ona mwahali mwani. Mi Ni bata kuyema fa ni kulapela, mi ni kutaha ku to beya mazoho aka ku bona, nina. Ku lukile, mutahe fela kwanu. Mina kaufela mutahe fela bukaufi, kuli mañi ni mañi a kone kufita cwale.

²⁷⁹ Mulimu Yomunde, ka Libizo la Jesu Kreste, lu lapelela sicaba se, babañwi ba bona ba ziyelehile, lihole. Kwani mazoho a bakutazi bani, Mulena, basweli kubeya mazoho kwapatia ni kwa mulaho ku yomuñwi ni yomuñwi. Ni lapela kuli U folise mañi ni mañi wa bona, Mulena. Lumeleza Moya o Kenile utahe fa sicaba se, mañi ni mañi wa bona, Ndate. Mi cwale Mata amatuna a Mulimu aba apese ona fa cwale, mi ha ba ye kwa mandu mi babe hande. Ka kuziba cwana, kuli Jesu naize, “Ha ba ka beya mazoho fa bakuli, bao ba ka foliswa.” No sepiisize cwalo, Mulimu Yomunde. Lwa lumela cwalo. Lwa lumela cwalo, kakuli No bulezi cwalo mi lu ziba kuli ku cwalo, kona mo ku kabela ni sicaba se. Ka Libizo la Mulena Jesu Kreste, Na ba fuyola kaufela bona. Amen.

²⁸⁰ Mulimu ami fuyole. [Hakuna manzwi fa tepu—Mu.]

²⁸¹ Pilu yaka ya amuhela foliso ya mañi ni mañi wa mina. Na lumela cwalo. Kikuli muka lumela hamoho nina, mañi ni mañi wa mina cwale? Ku felile. Ni mi bulelezi niti, kuya ka mo Ni zibela. Na mi lata, mi Mulimu ami fuyole. Mi Na—Na lumela, ka pilu yaka kaufela, u kaba hande. Mi cwale limbuyoti za ka libe ni mutu ni mutu wa mina cwale. Mi Mulimu ami talime ni ku mi sileleza. Mu inzi mwa litapelo za ka. Kikuli mu ka ni lapelela ha Ni li mwa Africa cwalo? Na—Na mi lata. Mi Ni ka mi bona kamuso busihu.



KANA MULIMU WA CINCANGA MULELO WA HAE? LOZ65-0427
(Does God Change His Mind?)

Liñusa le ka Muzwale William Marrion Branham, neli kutilizwe lwa pili mwa Sikuwa la Bubeli manzibwana, Lungu 27, 1965, mwa mukopano waba Full Gospel Business Men's Fellowship International ili fa Embassy Hotel mwa Los Angeles, California, U.S.A., iingilwe kuzwa fa tepu ya magesi ya manzwi ni ku hatisiwa kusina kuzusa sika mwa teni kuya Sikuwa. Toloko ye ya mwa Silozi nei hatisizwe ni ku hasanyiwa kiba Voice Of God Recordings.

LOZI

©2022 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Zibiso ya bahatisi

Litukelo kaufela li bulukilwe. Buka ye yakona kupulintwa fa pulinta ya mwa ndu kuli iitusiswe ki mutu kamba kuli ifiwe ku yomnwi, mahala feela, kakuba siitusiso sa ku hasanya Evangelí ya Jesu Kreste. Buka ye hailekiswi, kuatiswa mwa buńata, ku nepelwa fa moyá wa webusaiti, ku bulukwa mwa mukwa wo bunolo, ku tolokwa mwa mishobo isili, kamba ku itusiswa kwa kukupa masheleńi ku sina tumelelano niba Voice Of God Recordings®.

Ka litaba zeńata kamba ka libuka zeńwi ze liteni, shangwe muńolele kwa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org